

الطبعة الرابعة

15

مناظرة بالقطار

من الواقع السائر

مريد
دار

أشرف توفيق

مكتبي

Dr. Ahmed Mady

**Monday
27 Juli 2009
Tanta**

علائف: عمرو عبد العزيز

مزید
دار

EL Shorouk — الشروق



9990000548408

L.E10.00

منسوخة يا مصر ؟

AM
15-7-2003

wed
TANIA

مبسوطة يا مصر؟

"من الواقع الساخر"

مبسوطة يا مصر؟

"من الواقع الساخر"

أشرف توفيق

دار هزية للنشر

إهداء

- إلى المواطن المصرى البسيط الذى يركب المترو فى القاهرة.. والتوك توك فى باقى المحافظات .

- إلى المواطن المصرى البسيط الذى يلتزم بكل تعليمات الحكومة بداية من (ادى ضهرك للترعة) وحتى (نفكر بعقلنا) .. نرتاح كلنا) !!

- إلى المواطن المصرى البسيط الذى لا تشغله أنباء تدفق الاستثمار الأجنبى فى مصر ولا إقبال البورصة ولا الناتج القومى ولا فصل الإنتاج عن التوزيع ولا الخطة الخمسية القادمة ولا الفكر الجديد ولا عائد قناة السويس .. وإنما يشغله أمر الحصول على (عشرين رغيف عيش من الفرن) مع محاولة أن يحافظ على قميصه سليما أثناء المعركة !!

- إلى المواطن المصرى البسيط الذى يعود إلى بيته فرحا لحصوله على الدرجة الأولى فى وظيفته.. علما بأن الفارق بين مرتب الدرجة الأولى وماقبلها يعادل كيس شيبسى حجم عائلى !!

- إلى المواطن المصرى البسيط الذى لا يأتى فى برامج التليفزيون إلا فى تقارير حزينة من الشارع ومصحوبا دائما بموسيقى فيلم "المواطن مصرى" -عشان المود حزاينى- .. بينما يشاهد أحد المناضلين الشرفاء التقرير فى الاستديو المكيف وهو يشرب من زجاجة "المية المعدنية" قائلا: لازم نحل مشكلة تلوث المية فى البلاد !!

- إلى المواطن المصرى البسيط الذى يبحث دائما عن زعيم
ولا يفكر مرة فى أن يكون زعيما!!

- إلى المواطن المصرى البسيط الذى استطاع ببساطة أن
يخالف كل الحقائق العلمية ويقتنع بأن الماء فى مصر له لون
وله طعم وله رائحة !!

- إلى المواطن المصرى البسيط الذى كل أمنيته أن يكتبوا
على شاهد قبره بعد موته " فلان الفلانى.. تزوج قبل أن
يموت" !!

- إلى المواطن المصرى البسيط الذى يهمل فرحا بخبر انتقال
اللاعب الفلانى للنادى الذى يشجعه بكام مليون جنيهه فى السنة
بينما هو يمسح طبق الفول بأخر لقمة عيش !!

- إلى المواطن المصرى البسيط الذى غضب من احتراف
لاعب فى سويسرا.. ولم يغضب من احتراف كل فلوس مصر
هناك !!

- إلى المواطن المصرى البسيط الذى يُعتبر (الفيرجن) الوحيد
فى العالم الذى يحب الرياضيات فيدخل فى الثانوية قسم أدبى
ليلتحق بكلية العلوم فيتخرج من كلية الآداب ليعمل فى
المحاماة .. ودايما كلية الطب راحت منه على نص درجة !!

- إلى المواطن المصرى البسيط الذى لا تصله أبدا وعود
الحكومة ولا تطلعات المعارضة!!

إلى هذا المواطن أهدي كتابي..

ورزقه ورزقى على الله !!

أشرف توفيق

امتحاناتك يا مصر!!

امتحان اللغة العربية

(مجاب عنه)

السؤال الأول: التعبير

اكتب ما لا يقل عن ٦٥٠ سطر في أحد الموضوعات التالية:

١- لم يجد الطفل غير الشارع ملجأ نظراً لحالة البلد الهباب..فاتجه إلى السرقة والقتل والحشيش.. حتى نال جزاءه وقبض عليه متلبساً بباكتة بانجو.. اكتب قصته مع تسليم الحرز للباشا مراقب اللجنة.

٢- شهد بلدنا الحبيب نهضة في مجال التشييد والبناء وخصوصاً بعد وصول سعر الحديد إلى ٨٠٠٠ جنيه للطن واحتمالات بالزيادة.. اكتب ما يمليه عليك ضميرك على أن يبدأ موضوعك بعبارة (أنا باشتغل في حديد مُحسن).

٣- بعد انتشار ظاهرة أكل لحم الكلاب والحمير..من وجهة نظرك كحمار تكلم عن هذه الظاهرة ومن المتسبب فيها بدون غلط..الورق مترقب

السؤال الثاني: القصة

من قصة " وعهد الله ما انت داخل الانتخابات" .. اقرأ القطعة
ثم أجب عن الآتى:

(ثم أتى إليه وضربه بالجزمة وقال: انت عايز تترشح فى
الانتخابات ياد؟؟ دانت عايز معجزة.. مش كفاية بتاكلوا لحمة
ومستورين.. عايزين ايه تانى؟)

١- ما هى اللحمة؟ أو على الأقل حدد أقرب معنى خيالى
لها.

٢- مرادف معجزة فى اللغة (تغيير وزارى - زيادة
المرتبات - رغيف العيش) اختر يا مقلول البخت.

٣- اختر .. لماذا ضربه الرجل بالجزمة وليس بالعصاية
مثلاً؟؟

(أهو كسل .. لسة هيرفع العصاية؟ - عشان العصاية قلة قيمة
برضه واحنا فى عصر الديمقراطية - عشان العصاية شغالة
بس مش فى الضرب.. افهم انت بقى).

٤- حلل بمزيد من التفصيل جملة (ضربه بالجزمة) ومدى
توافقها مع جملة (مصر بتتقدم بينا)

السؤال الثالث: القراءة

من موضوع (الزعيم..والفنان.. والقدوة) اقرأ القطعة ثم
أجب:

(وقد نفى الزعيم الإشاعات التي أكدت أنه مرشح لوزارة
الثقافة.. وأكد أنه فنان فقط وليس سياسيا كما أنه مقتنع بكل
سياسات الحكومة)

١- في رأيك هل يصلح الزعيم لوزارة الثقافة أم لوزارة
الصناعة باعتبار أنه صرّح في أحد أفلامه أنه يجب المكن؟؟

٢- ذكرنا في الدرس أن الزعيم صاحب البوس الهادف _
سيتقاضى في فيلمه القادم ١٢ مليون جنيه.. في رأيك ياعم
المحروم تبقى البوسة بكام في الفيلم؟؟

٣- دخل كاتب هذه السطور إحدى مسرحيات المذكور .. في
رأيك ما السبب في دخوله؟

(أکید معزوم - طبيعي معزوم - وربنا معزوم)..
اختر على أن تضع إيدك على المصحف وانت بتخلف
للمراقب بتاع اللجنة.

السؤال الرابع: النصوص

أجب عن أحد النصين الآتيين:

من نص (ما شربتش من نيلها) .. اقرأ ثم أجب:
(ما شربتش من نيلها.. جربت تغنى لها.. جربت فى عز
ماتحزن تمشى ف شوارعها وتشكى لها)

١- ذكر فى الجرائد أن صاحبة النص أرادت أن تلد ابنتها فى
أمريكا لتحصل على الجنسية الأمريكية.. اختر.. ما المقصود
بنيلها فى النص؟

(المسيبى - الأمازون - يونج يانج)

٢- هذا النص من نصوص الحزب الحاكم والدليل وجود اسم
مهم من قيادات الحزب فى النص. استخراج الاسم.. وبوسه من
بقه ورجعه مكانه.

٣- أكمل الأبيات إلى آخر كحكة فى الكليب.

٤- قوبل النص بانتقادات بسبب ابتعاده عن الواقع.. وضح من
النص ما يتفق مع القول المأثور (اطبخى يا جارية .. كلف يا
سیدی).

من نص (حين ميسرة)..أجب عن الآتى:

١- اذكر اسم مصيبة واحدة حصلتش فى النص الأسود ده.

٢- وضح عبقرية الإرهابى فى النص وهو يكتب رسالة على الكمبيوتر باستخدام أزرار الأرقام فقط ومفيش حروف.. ويعطى أمر التنفيذ بزرار قايمة ستارت مش بإنتر.كمبيوتر إرهابى بقى!!

٣- فى نصى (ويجا) و(خيانة مشروعة) وضح خالد يوسف هستيريا الجنس فى الطبقات الغنية.. وفى نص (حين ميسرة) وضح خالد يوسف هستيريا الجنس فى الطبقات الفقيرة..عشان خطرئ.. اذكر مع كامل البيانات أماكن هذه الهستيريا فى منطقة إقامة واضع الأسئلة..على أن ترفق بعض الصور بورقة الإجابة.

٤- سبب وجود الشرطة كل خمس دقائق فى النص:
(موسم ترقيات عقبال أملتك ولازم شغل - الشرطة فى خدمة الفن - عشان الشرطة بتراقب قسم البوليس اللى جنب أحداث النص). اختر

السؤال الخامس: النحو

١- أعرب ما تحته خط.. لو مالمقيش القطعة أصلا .. اتصرف
٢- (ذهب الرئيس إلى المؤتمر) .. ضع الجملة السابقة في صيغة المثني .. ماعدا الرئيس طبعاً يا مفتح.

٣- (كان صاحب العبارة الغارقة قاتلاً) .. ضع إن مكان كان .. على ألا تنصب صاحب .. عشان هوه معروف وبينصب لوحده !!

٤- فُرِضت الضرائب علينا ببشاعة .. أعرب الجملة .. وارفع الضرائب أبوس إيدك.

السؤال السادس: الخط

(كوز المحبة انخرم طرطش على كُمى ..ياحبيبي بطل جفا وارحم عذاب أمى)

اكتب الجملة السابقة ثلاث مرات بثلاث خطوط.. كما يمكن التحويل من خط لخط بنفس الرقم .. فقط اتصل بخدمة العملاء.

امتحان الجغرافيا

اختر:

- تتعرض مصر لمنخفض الأسعار فى ... (يوم المنحة ياريس- طول السنة ماعدا يوم المنحة ياريس- هوه فيه منحة ياريس؟)

- عثر على آخر إنسان مات مستورا فى مصر فى عصر .. (قبل اختراع الزيت- قبل اختراع الحديد- أيام جوهر الصقلى)

- يزرع القمح فى مصر فى ... (الـ ٣ قيراط اللي عند عمك سويلم- على حدود أرض البانجو بتاعة عمك حمدان- بطلنا نزرعه عشان نستورده يافندم)

- يقع حى المعادى بعد التعديل الجديد فى ... (محافظة القاهرة- مشارف المنوفية- الجزء الجنوبى من شمال سيناء)

علل:

- كان الناس قديماً يأكلون (عيش وملح) .. وهذه الأيام يأكلون ملحا فقط ..

- أجاز أحد الأشخاص القبلات بين الأولاد والبنات المتجاورين جغرافياً عشان الشباب تعبشان .. ولم يحلل الأحضان .. جايز مكرومة وللا حاجة !!

- رغم أنه أعلن أنه سيغض البصر وهيلم نفسه إلا أن الحكومة مازال بينها خلاف وبين القطن طويل التيلة ..

- فى ضوء معرفتك بأن راقصة شهيرة قد أدت إحدى رقصاتها المحترمة لمجموعة من زملائك _ولاد المحظوظة_ بتوع مدرسة خاصة ..

ارسم خريطة كاملة التفاصيل للحدث .. مع الاهتمام بالتضاريس .. تضريس تضريس .. وعلى مهلك .. ويمكنك استخدامك الألوان !!

اكتب النتائج المترتبة على - بدون قلة أدب-:

- زيادة عدد السائحين في مصر كل عام
- المعدلات القياسية للعبور في قناة السويس من العملة الصعبة.
- أموال الضرائب بتاعة (المتفوتر) اللى اتفرضت حتى على الحلاقين.
- ملحوظة : ممنوع أن تكون إجابتك.. (ولا حاجة).. وسب الدين حرام.

سؤال المتفوقين

درسنا في السنوات السابقة في كل مراحلنا التعليمية أن أموال الضرائب تذهب لتأسيس البنية التحتية من مستشفيات وكبارى وطرق وخلافه..

- حدد على الخريطة _أدى دقنى لو قدرت_ أى مستشفى أو كوبرى سليم أساسا.. وشاور لى على أى طريق مافيهوش ٥٠ مطب!!

امتحان الفلسفة والمنطق وعلم النفس والاجتماع.. لكُشة واحدة !!

أجب عن الأسئلة الآتية:

- ما تأثير الخبرة الانفعالية الوقتية اللحظية للمواطن على الأداء التكيفي والمعرفي للحكومة.. مددلا على ذلك بأى حاجة فيها مصطلحات !!

- وضح أثر مشاهدة الأفلام المصرية على سلوك الأطفال الرضع مددلا على ذلك بذكر حالتين مصابتين بالبله المنغولى !!

- اذكر ٣٢٠ سببا من أسباب انتحار بعض الأفراد فى الشعب المصرى فى هذه الفترة مستثنيا من إجابتك الأسباب المعروفة مثل الغلاء وسعر البنزين والأجور والقنوات التى تتحدى الملل !!

- وضح أسباب استيطان مبدأ الشك فى نفوس الشعب المصرى تجاه الحكومة؟

- أكد داروين أن الإنسان أصله قرد . بغض النظر أن هذا السؤال هو سؤال فى مادة الأحياء وجه هنا غلط ..اربط بين نظرية داروين وبين أغنية "أنا باحبك يا حمار"

- ينقسم الشك إلى نوعين :شك فى الحكومة وشك فى مرانك ..وضح أهمية الشك الأول وتفاهة الشك الثانى !!

- الانحراف يمثل خطرا كبيرا على الفرد والمجتمع .. وضح أسباب الانحراف الرهيبة التى تؤدى إلى أن يشاهد الشباب ماتش كرة قدم مصرى كامل !!

- عندما سأل أحد الطلاب : ما المقصود بالدافع؟ أجاب: عندما يطلب منى سائق الميكروباص ربع جنيه زيادة عشان البنزين غلى فأقول له صارخا: والله ما أنا دافع ..حلل إجابة الطالب ومدى توافق إجابته مع جملة: (نحكم عقلنا .. ندفع ربع جنيه كلنا) !!

اختبر:

- كان حلم أفلاطون المدينة الفاضلة يوتوبيا.. فى رأيك ما المدينة الفاضلة فى مصر الآن؟
(البرلس اللي الناس ماتوا فيها من العطش- المحلة اللي عاملين مظاهرات عشان ياكلوا- المعادى باعتبار نصها فى القاهرة ونصها فى حلوان يعنى فاضلة من المحافظات.. بواقى م الآخر)

- ما الفلسفة التى يتبعها الشعب فى التعامل مع الحكومة ..
- ضع علامة صح أمام الإجابة الصحيحة مع ملاحظة أنه من الممكن أن يكون هناك أكثر من إجابة صحيحة:
- يانحلة لا تقرصينى ولا عايز عسل منك
- اطبخى يا جارية كلف ياسيدى
- ماتقولش إيه ادتنا مصر .. قول هنتهب إيه من مصر
- اللي يتكسف من بنت عمه مايجيبش منها عيال

سؤال الفرشة:

- كان ابن رشد من أشهر المدافعين عن الفلسفة فى تاريخ الإسلام .. بغض النظر عن الفلسفة فى السؤال .. اكتب أغنية محمد منير "على صوتك بالغنا" بالكامل .. التى كانت فى فيلم (المصير) !!

امتحان الأحياء

اذكر اسم المصطلح العلمي:

- ينتظرها الناس فيأمر بها الرئيس في الأول من مايو كل عام.. ثم تزيد الأسعار بعدها مباشرة لينساها الناس فوراً!!!

- امتصاص القميص _ اللي حيلتى _ لكميات هائلة من العرق المنهمر الساعة ٢ الظهر وأنا متشعبط في أتوبيس وسامع في الراديو إعلان ناس بتضحك ومبسوطة وبتقول " أنا باحب الصيف عشان بانزل البيسين" !!

- جزء مهم في جسم الإنسان .. (بيتفقع) فوراً بمجرد رؤية زعيم الفنانين _ بتاع البوس الهادف _ وهو يفتى في كل حاجة!!

- العملية التي يستفيد منها جسم (كُبرات) البلد من خلال امتصاص دم (صُغرات) نفس البلد!!

-التحول التدريجي والعودة إلى أصل الإنسان من خلال انتشار شعر صدر مطرب مشهور!!

ماذا يحدث في الحالات الآتية:

- قمت من نومك فوجدت كمية من الخبز _أدام الله ذكره_ على ترابيزة السفارة.. (اوعى تموت م الفرحة قبل ما تجاوب) !!

- اكتشفت أن سعر طن الحديد قد أصبح رُخص التراب ووصل بفضل الله إلى ٨٠٠٠ جنيه بس !!

-استئصال قلب الإنسان ووضع نصف رغيف مدعم مكانه..
عشان يبقى قلبك "حجر" !!

سؤال المتفوقين:

- بالتجربة العملية.. أثبت أن مصدر الفلوس المهربة خارج مصر هو عرق الشعب المصرى!!

- ارسم من خيالك الجهاز الهضمى لسمكة قرش فى البحر الأحمر أكلت حالا مواطنا مصرى من عبارة غارقة .. (اوعى تعيط .. خليك مؤمن ياراجل) !!

الإجابة النموذجية لامتحان اللغة العربية

إجابة التعبير :

- ٦٥٠ سطر كثير قوى عليا .. اكتب أنت ما تشاء وسأكتب
على كتابتك "نظر" !

إجابة القصة:

- اللحمة هي شيء خرافي ورد في القاموس المحيط ولسان
العرب ولم يذكر في المعجم الوجيز عشان المعجم الوجيز لسة
جديد. وذكر بعض المؤرخين أن اللحمة هي شيء
يؤكل..ولكن آخرين أكدوا أن اللحمة هي شيء يشرب.. ولم
يُعثر في الشعب المصري الحالى على مواطن واحد يستطيع
الجزم فى الأمر !!

- مرادف معجزة فى اللغة (كل ماسبق أضف إليهم ان الواحد
يتلم ويلبس دبل قبل مايموت)
- ضربه الرجل بالجزمة وليس بالعصا (لا يوجد إجابة
صحيحة)

الإجابة الصحيحة : ضربة بالجزمة وليس بالعصا عشان
مكسل يوطى !!

- تظهر بوضوح العلاقة بين الجملتين (ضربه بالجزمه)
و(مصر بتتقدم بينا).. حيث أن المعروف أن مصر تتكون من
عدد من الأفراد وإذا وفرت الحكومة لكل فرد من يضربه
بالجزمة فسينتج من هذا الفعل دفعة أكيدة للأمام وإذا طبقنا هذا
الفعل على كل الشعب المصرى سنصل إلى النتيجة النهائية
وهى أن مصر بتتقدم بينا فعلا !!

إجابة القراءة:

- يصلح الزعيم لوزارة البوس والصراف الصحى
- إذا قسمنا عدد ١٢ مليون جنيه على عدد البوس فى الفيلم..
ولأن الفيلم كالعاده سيكون كله بوس.. سنكتشف أن الخمس
بوسات بشلن!!
- وربنا .. وعهد الله .. والله العظيم .. كان معزوم

إجابة النصوص:

- المقصود بنيلها في النص : مصرف أبو خشية المطل على قرافة أولاد المرحوم أبو سيد.

- اسم من قيادات الحزب الوطني هو الأستاذ (جربت) وقد تم ذكره مرتين في النص.. وتم بوسه حضرتك .. ورجعته مكانه.

تكملة النص:

دور جواك تلقاها هيه السمنة وهية الكحك
هتجوع وتضيع وهنتغرب وهتسحت من غير شك
يمكن ناسى عشان مش فاضى
أو مشغول بالكادر الماضى
بس اللى مجرب ايامنا
قال أنا راضى لكن مش راضى!!

- يقول الشاعر ببساطة أنك لا بد أن تغنى لها (اللى هيه بلدنا
يعنى) حتى ولو كانت هيه (بتغنى علينا) وأيضا يطلب الشاعر
من القارئ أن يأخذ عربيته (الفور باى فور) وأن يتجه لكى
يلف شوارع مصر وحواريها لكى يشكى لها (وهوه اللى عنده
عربية فور باى فور هيشكى لها من ايه إن شاء الله؟).. كما
يطلب الشاعر منا أن نبحث فى أنفسنا وفى جيوبنا (وعهد الله

ما خدت حاجة) فسوف نجد بلدنا بكل بساطة كمفاجآت السحرة
(جلا جلا واللى يحب النبي يصقف).. وبعد هذا كله يطلب منا
الشاعر أن نحب بلدنا ولهذا فإننا بالرجوع إلى السؤال
سنكتشف أن مصر عملت اللي عليها .. وكلفت .. وما عليك
إلا أن تطبخى يا جارية !!

من نص حين ميسرة

- المصيبة الوحيدة التي لم تحدث في الفيلم هي البركان ..
وقد اعتذر المخرج عن عدم حدوث البركان في الفيلم لقلّة
الإمكانات ويتعهد للمشاهدين أنه في أفلامه القادمة سيقدّم
الزلازل والبراكين والسيول وزورونا تجدوا ما يسركم !!

- السؤال شارح نفسه حضرتك .. بلاش غباوة بقى !!

- أماكن هستيريا الجنس في محل إقامة حضرتك لن تتحدد إلا
بعد أن ترفق مع ورقة الأسئلة خريطة بالمنطقة وهل أصلا
انت تبع حلوان وللا القاهرة وللا ٦ اكتوبر؟؟ حدد منطقتك
وتعالالى يا خفيف !!

- سبب وجود الشرطة كل خمس دقائق في الفيلم : براحتهم
حضرتك .. إلا دول محدش ينطق معاهم !!

إجابة النحو:

• الإعراب:

الوزير: فاعل طبعاً بس مش مرفوع بقاله عشرين سنة أهو

المواطن: مفعول به مجرور بالجزمة

الطابور: خبر اسود ومهيب

سبل التتمية: مضاف ومضاف إليه.. أى كلام يعنى.. وكلام

الناس لا بيقدّم ولا يأخر!!

• الجملة فى المثنى

(ذهبان الرئيس (لوحده وعهد الله) إلان المؤتمران) .. كده

كويس يا حضرة البكباشى؟؟

• أنا محدش يلوى دراعى.. أنا انصب اللى انصبه!!

- فُرُضت: فعل بيحصل غصين عننا طبعاً

- الضرائب: نائب فاعل مرفوع بس بالضمة المقدرة .. أى
كلام يعنى

- علينا: ده الطبيعى حضرتك .. أمال هيبقى على مين
يعنى؟؟

- ببشاعة: ده أقل حاجة يا فندم!!

السؤال السادس: الخط

اكتشفنا بعد مراجعة ما كتبناه من كل الخطوط أن كلهم زى

بعض .. فواتير وشبكة وخدمة عملا .. يرجى إلغاء السؤال

أحسن .. هو ورق ع الفاضى؟؟

مرارتی یا مصر!!

ياريتنى كنت ف ثانوى

العزيزة /

أبعث إليك بتحياتى الحارة المحملة بدستتين جاتوه

ثم أما بعد

طالعت بمزيد من الأسى والحزن ذلك الخبر الذى نزل على
كالصاعقة والذى أكد فيه بعض الوحوش أنك قد رقصت
لبعض طلاب الثانوية العامة _ ولاد المحظوظة _ فى احتفالهم
السنوى فيما يسمى باحتفال البروم. تلك الرقصة الذى تطاولت
عليك بسببها السنة الحاقدين والحاسدين ومنعدمى الذوق والفن.
وصدقيني يا سيدتى أننى لا أعرف هذا البروم ولم أحضره
قبل ذلك.. ففى مدرسة الثانوية التى كنت بها فى قرينتا
المصون كانوا يحتفلون بنا كل يوم وليس كل تيرم.. حيث
تتهال الاحتفالات على قفانا من كل المدرسين ولسان حالهم
جميعا " ايه اللى جابك المدرسة النهاردة يا معفن انت وهو؟؟"
فكما تعلمين سيدتى أن مرتب المدرس لا يكفيه حتى بعد
الكادر _ أبقاه الله لهم ذخرا ورضى الله عنه _ فليس هناك
ضرر من بعض الدروس الخصوصية التى يكون مقابلها
شوال رز وكرتونتين بيض وقفص بطاطس من البايظ.. ولذلك
كانوا يطردوننا ليمارس كل منهم دوره التعليمى التثقيفى أبو
عيون جريئة ولكن مع غيرنا !!

أعرف أن من رقصت لهم لم يمر عليهم حالي هذا.. فهم من الذين يفطرون صباحا من العيش التوست _ حد الله بينا وبينه _ والجبنة الشيدر _ عارفها من الإعلانات والله _ ويأخذون مصروفا في اليوم يعادل مصروف فصل تالته ثانوى عندنا بالكامل.. واحتمال يكون مصروف المدرسة كلها بالناظر كمان !!

ولكننى مع جهلى بمثل هذه الحفلات إلا أننى أستطيع أن أتخيل ..ولا تقلقى فسوف أستحم كثيرا قبل أن أتى إلى مثل هذا الحفل حتى أبدو نظيفا مثلهم ..وربما جعلت شعرى "سبايكى" ولطشت موبايل بكاميرتين من أى صاحب لى!!

ولكننى سمعت أنك قد أثرت الاحتشام فى مثل هذا الحفل ولم ترتدى بدلة الرقص كاملة.. بل وإنك _وا أسفاه_ قد غطيت أجزاء عديدة من جسمك _ مش عديدة قوى يعنى _ فلم تستطيعى التحليق فى سماء الرقص.

إننى ياسيدتى أتضامن معك بروحى .. ومستعد للوقوف على سلم أى نقابة _ لو هتلقى معايا يعنى _ من أجل المطالبة بتعميم هذه التجربة المفيدة والمثمرة لكل الأجيال.. وأن يطبق هذا النظام فى التعليم الابتدائى والإعدادى أيضا.. وأن يكون الحافز لكل طالب.. أنه إذا اجتهد فسوف يراك وأنت ترقصين.. وأظن أن هذا سيسبب زيادة فى أعداد المقبولين بكليات الطب والهندسة والبتترول وسيجعل راية مصر عالية خفاقة فى سماء العلم والتكنولوجيا!!

إننى أطالب بأعلى صوتى يا سيدتى أن يكون يوم رقصك
السابق لطلاب الثانوية أبناء تلك المدرسة الخاصة
المحسودين من كل طلاب مصر هو يوم عيد للعلم
والمعلمين .. لنروى لأبنائنا بعد ذلك كيف استطاع أجدادهم أن
يحفروا فى الصخر بموبايلاتهم حتى يروا عملاقة الرقص
وهى ترقص.. كما أطلب أن يكون النشيد الرسمى لهذا العيد
"تعيش دودو حرة مستقلة"!!
ولسيادتكم جزيل الشكر

مقدمه لسيادتكم
الندمان على إنه مش فى ثانوى

أشرف توفيق

ملكة جمال البقر

البلد عملت مسابقة ملكة جمال البقر يا جدهان !!

والخبر جاى فى كل وكالات الأنباء والصحف.. وجايبين صورة البقرة وهما غاسلينا وحاطين على شعرها قطرات من شامبو الشعر.. وحاطين جيل على شعر حواجبها عشان ماييقاش على الخدود يهفهف ويرجع يطير.. وملمعين القرنين وعاصرين عليهم لمونتتين !!

المسابقة ماشاء الله كان عليها إقبال كثير وده بسبب زيادة أعداد البقر فى البلد بشكل ملحوظ.. وكانت فى التصفيات ١٢٠ بقرة بالصلا ع النبى.. ذول بقى اللى عدوا من اختبارات كشف الهيئة وطول الفرن وجمال الديل.. من الآخر ذول البقر المزز بقى !!

وبدأت تصفيات المسابقة الرهيبة.. وفيه كام بقرة طلعت بررة المسابقة عشان خايفين على نفسهم من تحرشات الجاموس اللى بيحكم.. ومفيش بقرة شريفة ترضى انها تتكشف وهيئه عريانة قدام اللى مايسواش واللى مايسواش !!

وبعد محاولات للوقية بين آخر بقرتين.. وبعد أن استخدمت البقرة الفائزة سلاح الإغراء على الجاموس اللى بيحكم.. فازت بقرة أسبوط بالمسابقة وسط تصفيق وتهليل..

وزع كاكولا يا ابو صابر !!

وزغرى يا ام بهانة !!

الجميل بقى فى الموضوع ده لجنة التحكيم..أبوة..لجنة
التحكيم حضرتك من أسبانيا

يعنى احنا جينا تليفونات مُحَكِّمين من أسبانيا.. واتصلنا بيهم
وقلنا لهم: احنا بس عندنا مسابقة ملكة جمال البقر على قد ما
قَسْمُ.. فضلة خيركم يعنى .. وعائزينكم تشاركونا
الفرحة..وعلى رأى المثل ..خليك بقر يحتر عدوك فيك !!
وطبعا بقى رفعنا يَفْط كبيرة احتفالا بالمسابقة وشعار
المهرجان:

(بقرة جميلة ترفع بلاوى كتيرة)

وأغنية المهرجان بقى: (هيه البقر كده لبيبيبيبييه.. بقى ليها
لون تالانى)

طب البقرة اللي فازت علّقوا لها الميدالية الذهبية فين؟؟ فى
قرنها؟؟وللا ف ديلها باعتباره موطن الإغراء؟؟

طب تعرفوا الجائزة كام؟؟ ٥أجولة علف..بس علف ملكي
بقى.. مش من بتاع البقر التانيين..يعنى مثلا زى ما احنا
بناكل الرغيف اللي بَشَلين اللي مايتاكلش..وغيرنا بياكل فينو
من النضيف.. ليه بقى؟؟؟ عشان همّا بقر

وزيادة عن جايزة العلف..البقرة هتاخذ ٣٥٠ جنيه كاش..يعنى
مش هتروح صرّاف آلي ولا حاجة..هتستلمهم حافر بحافر
من الجاموس اللي بيحك !!

اوعى حد يفترى على الحكومة ويقول انها أغفلت مناسبة
عظيمة زى دى.. يتقطع لسان اللي يقول كده..المحافظة
بنفسها كانت متابعة المسابقة وهيه اللي أمرت بصرف

الجائزة.. حكومتنا زى الفل..بتعمل مسابقات وطنية جامدة..
النهاردة البقر ..بكرة مسابقة أجمل كلبة..وبعد بكرة مسابقة
أجمل بُرُص..والجائزة هتبقى شبشب يفرم أمه ع الحيطه !!
واحد هيسألنى: طب وال ٣٥٠ جنيه دول جايبين منين؟؟
أقول لحضرتك: دى فلوس موظفين الضرائب العقارية اللي
معتصمين فى الشوارع وفلوس الدّعم اللي عايزين يلغوه..
وفلوس مصاريف الجامعات اللي زادت كام ضعف..وفلوس
مرتبات مدرّسين شباب مانعين تعيينهم عشان مفيش
ميزانية..لا ماتقلقش الحكومة بتتصرف يابا !!
والبقرة زمانها بتحلم بقى دلوقتى بأقرب ملكة جمال بقر
العالم..ويمكن تشتغل الفيلم الجاي مع نجم النجوم برضه..
ويجيلها عقود احتراف من كل مزرعة فى العالم !!
وياسلام بقى وهيه ماشية تتغندر بقى فى أسبوط ولابسة التاج
الملكى (ماشية السنيورة
كده كده أهو.. عايزالها صورة.. كده كده أهو)..ويعملوا
الحوافر بالمونيكير والباديكير..وأكيد برضه هتشرب من
الترعة الأول قبل بقية البقر !!
البقرة هتاخذ ٣٥٠ جنيه يا جدعان !!
ناس ولاد شحبير صحيح !!

من رمسيس لنفرتيتي .. ياقلبي لا تحزن

كنت قررت معدتش اقرا جرايد وارتاح.. كل اما اقرا
جريدة قومية تقول لك الناتج القومي زى الفل ومعدناش
بنصرف زى زمان وبدأنا نرش شوية فكة على البلاد حبايبنا
عشان حق الجار والسحابة السوداء بقت بيضا وفتحنا ستين
مصنع جداد بيعملوا من الإبرة للفتلة و مصر كلها بقت
بتشتغل.. أقول ياواد ما دام مصر كلها بقت بتشتغل يبقى مش
مشكلة انت يعنى.. واصدق وخلص !!

آجى اروح لجرايد المعارضة أكتشف ان المية بقت زفت
والهوا بقى هباب والناتج القومي زى القطران وبقينا بنشحت
يا رجالة وكل مصنع اتفتح اليومين دول كان مفتوح بقاله كام
سنة أساسا بس مكانوش لاقيين المقص بتاع الشريط ..
والشباب مش لاقى شغل..والواد انتحر عشان مالفكاش فكة
يجيب صنائير .. وربنا كارمنا الحمد لله !!

قلت اريح دماغى وماقراش .. أو افتح على النت صفحتين
واحدة قومية والثانية معارضة واعيش بقى .. بس الخبرين
الجايين دول دول خللوا دماغ الواحد يشت خالص وربنا
وخصوصا انهم من جريدة قومية يعنى المفروض مفرحين
والخبرين يخلصوا حبايبنا الفراعنة بتوع المسلات

الخبر الأول

عملوا مؤتمر صحفى رهيب فظيع مريع شنيع وقالوا انهم بفضل الله تعالى وبمجهود خرافى نحسد عليه وفى زمن قياسى عثروا على خصلة من شعر رمسيس الثانى طويل العمر يطول عمره ويزهزه معبده ويحفظه على مين يعاديه..ها هيء قلبى هيفطم الفرحة يا جدعان ... قال ايه واحد غبى أجنبى ورثها عن جده اللى كان بيحفر المقبرة من زمان والغبى كان عايز يبيعها على الننت برقم كده تافه لا يتناسب مع نعومة شعر رمسيس بيه بمبلغ فيه شوية أصفار عمى ،رمسيس ده يا جماعة كان مخلف ييجى تلتमित ربعمية عيل بالصلاة على النبى .. يعنى كان شغال لوحده.. بدراعه فى البلد ما شاء الله مش محتاج رجالة معاه يعنى !!

خصلة من شعر رمسيس بكل الأصفار دى ويتعمل لها مؤتمرات صحفية كمان؟

طيب أنا عايز اعرف الخصلة دى تمنها كده لوحدها وللا حاسبين من ضمن التمن القشرة و الحشرات اللى فى الشعر ؟ طبعا يا جماعة أكيد الحاجات اللى فى شعر رمسيس غير الحاجات اللى فى شعر سنية بتاعة أصلح بوابير الجاز .. دى حشرات ملكية ..ممكن حد ذكى يقول مش يمكن كان رمسيس بيستخدم هيد أند شولدرز مثلا؟ أقول له يا عم الذكى لو راجعت تاريخ موت رمسيس هتكتشف انه مات قبل هيد أند شولدرز ما يبقى اتنين فى واحد .. ساعتها كان واحد بس !!

الخبر الثاني

بلد أوروبية شقيقة صديقة حليفة عزيزة وهيبة اللي تحت الشجر..أظن انها ألمانيا مش عارف .. رفضت تجيب راس الحاجة نفرتي بتاعتنا تزور مصر يومين وترجع والسبب انهم خافين من الجو الخنقة والتراب والتعرية بتاعتنا على راس الدلعدي نفرتي..أصل الست كان عندها ضغط بعيد عنكم وخافين تجيلها الأزمة وهيه هنا محدش يقبلها فى المستشفيات عشان راس من غير جثة ..مش نفرتي دي بتاعتنا يا جدعان؟؟ طب هاتوها حتى تطرى القعدة فى المتحف المصرى يومين بدل ما كل اللي فيه ملوك بشنبات بيلعبوا (صنم واقف) طول النهار !!

لا والحلو فى الموضوع أوروبا بقى خافت ناخذ على خاطرنا (ونحط تابعنا التغيير فى تابعها التغيير ونخاتمها) قالت انهم هيبداوا يعملوا متحف ليهم عندنا هنا فى اسكندرية يحطوا فيه حاجات أثرية ليهم عشان ما نزعش يعنى .. طب والسناكيح دول عندهم آثار ايه؟؟ دول مولودين أول امبارح.. دا لو عملوا متحف لآثار أمريكا وأوربا مع بعض نجمعه فى حمام المتحف المصرى .. ده بيتنا الأصفر اللي فى الأرياف أقدم من البيت الأبيض اللي فى أمريكا..طبعا ما دام الآثار بقت كلها شعر بقى زى الخبر الأولانى .. أكيد هيجيبوا لنا شنب هتلر وحاجب موسولينى وشعر صدر كلينتون .. وللا بلاش شعر صدر كلينتون عشان مش عارفين مونيكا وصلت لحد فين معاه.. والمتحف ده طاهر وهيفضل طول عمره طاهر !!

اللى هيقوللى برضه لازم يخافوا عليها ومتجيش والجو هنا
وحش هافجر برضه الكتاب ف وشه .. ما تيجى يا عم انشالله
حتى تتهرس تحت عربية .. مش بلدها دي برضه ؟؟..
وللا هيه عايشة أو ميتة هتعيش مرتاحة يعنى؟

وبعد أيها الأخوة

يا ريت ماتكتبوش .. البلد زى الفل واحنا كويسين ولازم
نبص للنص المليان من الكوباية ولازم نتفاهل عشان عايزينها
تبقى خضرا

ألف سلامة على شعر الحاج رمسيس الثانى

ألف سلامة على راس الحاجة نفرتي

ألف سلامة على قلب الحاج أشرف

وسمعنى سلام

يبقى انت أكيد .. أكيد فى مصر !!

للمناققين فقط

الناس فى الشارع المصرى مالهومش سيرة غير زيادة
سعر الحديد والأسمنت ومواد البناء كلها.. ومفيش سيرة غير
ان الحكومة هيه اللي تسببت فى اللي حصل ده.. وطبعاً بما
إنى مقتنع تمام الاقتناع ان الحكومة بريئة من التهمة الفظيعة
المريعة الشنيعة دى.. فأحب أنوه _ وخلي بالك من أنوه دى _
على أن الحكومة زى الفل ومفيش عليها أى غلط..

أنا شايف واحد بيقول عليا منافق.. قلت لكم إلا كلمة منافق
دى .. أنا ماكرهش فى حياتى قد النفاق.. بس تعالوا نحسبها
بالعقل.. دلوقتى انت عايز تبني بيتك ليه؟؟ عايز الحديد
والأسمنت ف ايه؟؟ رد عليا يافالح..

انت أساساً لاقى تاكل وللا تشرب؟؟ كيلو الرز بقى بخمسة
جنيه وانت رايح تبني حضرتك؟؟ وبعدين انت رايح تبني ليه؟
عشان تتجوز .. عايز تتجوز وتقعّد تجيب عيال ومصر تتزحم
أكثر وأكثر والموارد بتاعتنا اللي منغنا دى تقل والحكومة
متعرفش تصرف علينا؟؟ انت مش متابع وقفة مصرية وللا
ايه؟

الحكومة حاولت كثير اننا ننظم النسل وماما كريمة مختار
زهقت فى إعلانات الدنيا وبرضه شغالين زى الفل وبيجيانا
عيال كل كام ثانية.. قامت الحكومة قالت خلاص نغلى الحديد

عشان الشاب من دول مايلقاش يعمل شقة يقعد يتحرق فى بيته
ولا يتجوز ولا يتنيل .. يعنى اللي اتجوزوا خدوا ايه؟؟
وبعدين لما الحديد والأسمنت هيغلوا يعنى.. أسعار الشقق
كمان هتغلى وهتبقى فى العالى.. يعنى حتى لو معاك قرشين
وعايز تأجر شقة مش هتقدر ياخفيف ولا طبعاً هتشتري..
تشتري ايه؟؟ هوه انت عارف تشتري شقة طعمية عشان
تشتري شقة تسكن فيها.. ده ساندويتش الطعمية بقى بجنيه
ياعم!!

وبعدين ده مش راس مال وطنى برضه؟؟ يعنى الناس
الكبريات دول لما يگتتوا اكرت واكرت احنا كمان بنغلى معاهم ..
طبعاً أمال ايه.. وبعدين انت مسمعتش أغنية متقولش ايه ادتنا
مصر.. قول هندی ايه لمصر؟؟ انت مش من حبايب مصر
وللا ايه ياعم؟؟ ماتدى ياعم الحاج .. إدى بزمة كمان!!

وبعدين حد هيقول لى ان فيه واحد مخترع عمل قوايم بديلة
من البلاستيك عشان الناس تستخدمها بدل الحديد .. وتبنى بيها
بس الحكومة رفضتها.. طبعاً ياعم لازم ترفضها عشان
الحكومة قالت ان ده ضد صحة المواطنين وان ممكن البيت
يقع على نافوخ اصحابه لو اتعمل بالنظام ده .. هيرد عليا
ويقول: ياعم ما العمارات كده بتقع وكده بتقع.. سواء بالمادة
الجديدة هتقع أو بالأسمنت المغشوش والحديد البايظ هتقع يبقى
ايه الفرق؟؟ هاقول لك ان الفرق انك تكون ميت وانت عامل
اللى عليك تبع الدولة ومش غلطان .. يعنى ميت فى السليم..
إنما لو بنيت بالمادة الجديدة والقوايم البلاستيكية دى يبقى انت

كده ميت غلط وموتك غير مطابق للمواصفات..افهموها بقى..
جتكوا نيلة.. مليتوا البلد !!

وبعدين بدال ما تقعد تتحسر كده ما تجرب حظك فى البورصة
واشترى كام سهم كده فى الحديد اللي بيعلا ده .. أنا عارف
ان كل اللي حيلتك مايجيش تمن سيخ حديد واحد.. بس أهو
برضه تبقى من علية المستثمرين ..واللى يسألك رايح فين؟؟
رايح البورصة .. جاى منين؟؟ جاى من البورصة.. وخذ
معاك وانت ماشى سيخ الحديد بتاعك دلالة على إنك راجل
فاهم وبتتاجر فى حاجة مضمونة!!

ومش عارف انت شاغل دماغك بحاجات بسيطة وسايب
حاجات مهمة جدا فى المجتمع مش بتفكر فيها .. يعنى انت
ياراجل قاعد مهموم وبتفكر فى زيادة سعر الحديد والأسمنت
وبقية الأسعار وناسى المشكلة الضخمة الفظيعة المريعة اللي
شاغلة رأى العام وهيه مشكلة عصام الحضرى!!!

العالم سنة ألفين

زمان أيام إعدادي كان عندنا درس في القراءة اسمه العالم سنة ألفين.. كان لسة على سنة ألفين ٨ سنين كده (أنا مش كبير على فكرة وأقدس الحياة الزوجية وأشارك في الأثاث).. المهم الدرس قاعد يوصف بقى العالم هيبقى ازاي.. وانا هنعيش في رفاهية والدنيا حلوة وهنلبس ابيض في ابيض ونطير في السما زي آخر فيلم رابعة العدوية ونغنى الرضا والنور وكل الكلام البمبي ده !!

كنت ساعتها مصدق واقول ياترى هعيش لغاية ما العربية تمشى بعصير القصب زي الدرس ما قال؟؟ واتصور بقى الواحد بدل ما يركن عربيته في بنزينه يركنها عند أقرب محل عصير قصب تمانين أو تسعين أو سولار على حسب نوع المصّ قصى نوع العربية.. ولو العربية عطلت في نصّ الطريق .. الواحد ينزل يمصّ زَعْرُوعَتَيْن ويحطّ في التّكّ.. وطبعاً هنخلى إخواننا الصعايدة هما اللي يمصّوا لعربيّات النقل.. الناس دي فيهم صحة برضه.. طب ولو عود القصب مسوّس إيه اللي هيحصل؟؟ ممكن العربية تبوظ كده.. بس برضه احنا هنعمل حسابنا وناخذ جركن تمر هندي احتياطي استبين يعني !!

وتتعمل إعلانات جامدة بقى.. قصب الحاج عويس من الأرض إلى سيارتك.. ليه تمصّ قريب مادام ممكن تمصّ بعييد؟؟

ولو واحد طهقان من مراته ووشها اللي شبه قسيمة الطلاق
يقوم ينتحر ويرش على نفسه قصب بقى ويولع فى نفسه !!
وكمان قالوا ان العربيات هتبقى فوق وسادة هوائية.. أيوة
مخدة يعنى.. يعنى الواحد وهو بيتجوز ينجد السرير
والأنترية ومخدين صغيرين عشان العربية الفيات اللي عنده
هدية لمراته.. وعلى حسب معزة مراته بقى.. ممكن ينجد
مخدين ليها وممكن ينجد مخدة واحدة عشانه ومراته ترمى
فى الكرسى اللي ورا تتحرق بجاز بقى أو بقصب يعنى!!
وكان بيقول لك كمان ان القمر هيتأجر.. أى وربنا.. هيتأجر
ورحلات بقى وبتاع.. وبدل الكمسرى مايقول واحد الهرم
وطالع.. يقول واحد القمر وطالع.. طب الكمسرى هيتشعبط
فين؟؟؟ دول بيقفوا على قفا الواحد فى الأتوبيس.. ولما نوصل..
السواقين يتشاكلوا بقى مين يحمل القمر قبل التانى.. طب ينفع
كده؟؟؟ وجيراننا الأقمار التانية يقولوا علينا ايه؟؟
وطبعا هتبقى شقق القمر ايجار جديد مش قديم.. مش معقولة
الواحد ياخذ شقة فى القمر أربع أوض وصالة وحمام بحرى
فى الجو ويدفع عشرين جنيه مثلا؟؟؟ وأكيد هيبقى فيه تأمين فى
الأول زى شقق الأرض.. وأكيد التأمين على حسب مكان
الشقة.. يعنى الشقق اللي ف نص القمر أكيد أغلى.. ليه
بقى؟؟؟ عشان القمر لما يبقى هلال ويصغر من الجنب.. الشقة
ما تبقاش ضيقة عليهم!!

وللا قصص الخيال العلمى.. دى كوم تانى بقى..يقول لك ان
زمن القصص دى بداية القرن الواحد وعشرين..أبوة اللى
عدى ده حضرتك..ويقول لك ايه بقى:

(أخرج من جيبه إبرة فاستطالت وتمددت فضغط عليها
فأصبحت كرسى ثم نفخها فصارت سرير.. وطار بها من
على كوبرى عماد بعروور فاستقر فى بيته.. وكانت هذه إحدى
اختراعات الإدارة فى القرن الواحد و العشرين).. ياسلااام !!
وقالوا كمان ان هيبقى فيه اختراع اسمه الانتقال الأنى.. يعنى
ممكن تنتقل كده بالجهاز من المعادى للهرم فى غمضة
عين..تتحط فى الجهاز من هنا تطلع تبوس راس أبو الهول
هناك..طبعاً أنا عارف ان ممكن الواحد برضه ينتقل من بيته
إلى قسم بولاق فى غمضة عين بس أكيد مش بالجهاز ده..
أكيد فيه أجهزة تانية وعُصيان مخصصة للنقل.. وتصوروا
بقى أنا لو عندى الجهاز ده.. أنا أحط الراجل صاحب العمارة
اللى انا فيها فيه واطلع روحه رايح جاى..عشان يحرم ياخذ
منى تأمين للشقة..ولما أزهد أسيبه جوه الجهاز عشان يتبوا
فى أمريكا اللاتينية بقى !!

والمصيبة انهم كانوا بيقولوا ان الكلام ده هيجصل هنا .. فى
مصر العظيمة لى وطن وهى الحمى وهى السكن.
طب القرن الواحد وعشرين عدى منه تمن سنين..العربييات
زى الفل بتشرب أحلى بنزين وفراملها زى الفل من غير
مخدّات..والقصب لسة بيتشرب.. ومشفتش يافطة ممنوع
شرب القصب فى البنزينة لغاية دلوقتى..والقمر لسة مانع نظام

الإيجار لحد الآن.. شكلها هتبقى تمليك في الآخر.. والراجل
صاحب العمارة نازل طالع ياخذ فلوسى من غير جهاز انتقال
انى ولا انتقال إلى رحمة الله..

الكهربيا والمية والزباله والبطالة والبقول والزحمة والغلا لسة
موجودين !! وتسالنى المطربة المشهورة فى أحد أحلامى:
ماشربتش من نيلها؟؟

هاقول لها :حضرتك شربت والله

ترد عليا وهيه بتفكر : طب جربت تغنيلها؟؟

هارد عليها برضه :غنيت وعهد الله وحافظ أغنية ماتقولش ايه
ادتنا مصر قول هندى ايه لمصر..يا يا يا حبايب مصر

تشخط فيا : جربت تلف ف شوارعها وتحكيلها

هاشخط فيها أنا كمان :حضرتكم بتلفوا ف شوارعها بالعربية
الشيروكى .. أنا بالف على رجليا..يعنى باحكى اكثر منكم ..

الشعب كله بيكلم نفسه

وعندما لا تجد إجابات مقنعة فى الحلم طبعا تقول لى :

طب ايه رأيك فى عمائل الكحك بتاعى فى الأغنية؟؟؟

أفلامك يا مصر

فيلم هندي

المشهد الأول

أميتاب باتشان _ وهو شاب _ لسة راكب الفيل بتاعه
ورايح الشغل وكالعادة بيشتغل ظابط .. وهو راكب قاعد
يغنى بالهندي أغنيته المفضلة (واركب الفيل .. درجن درجن
وانقيل .. درجن درجن .. ساعتين في اليوم .. واشد الخرطوم
.. ولا هيببييه) .. يسمع وهو راكب صوت طفلة رضية
بتعيط .. يركن الفيل على جنب وينزل يلقي طفلة رضية في
اللفة جنب الجامع.

يتأثر جدا أميتاب من منظرها الرقيق فيغنى لها نص ساعة
وهيه كمان تغنى له نص ساعة .. ياخذها يحطها على الفيل
عشان الفيل يوصلها البيت ويروح هو شغله عشان عندهم
النهاردة تعديل دستور الهند .. وهو ماشى يبص ع اليفط
المتعلقة في كل أنحاء البلد: " الرئيس شوهان يرفض التوريث
" بيتسم ابتسامه هندي ويقول بالهندي :
(الشعب ده هندي) !!

المشهد الثاني

تفوت سنين.. أميتاب راجع من شغله _وعلى فكرة لسة شباب برضه_ وداخل البيت.. البنت اللي كان لاقبها قدام الجامع كبرت واحلوت.. بقت مزة هندي يعنى..
يحبها وتحبه.. ياخذها على الغيطان.. يغنى لها نص ساعة وتغنيله نص ساعة.. وفجأة تيجي العصابة بتاعة الراجل الشرير حوالى ستين واحد عشان يخطفوا البنت عشان هيه دى البنت الوحيدة فى الهند كلها اللي الراجل الشرير الوحش عايز يتجوزها.. أميتاب يحضن حبيبته بايد وشغال ضرب فى الرجالة بايده الثانية.. يخلص على الستين واحد كلهم بمسدساتهم بمطاويهم بس للأسف ضافر واحد منهم خدش ذراعاه..حبيبته تجرى عليه تغنى له نص ساعة ويغنى لها نص ساعة وياخذها على البيت بسرعة عشان عندهم النهاردة تعديل دستور..وهوه ماشى يبص ع اليفط اللي فى الغيطان:
"الرئيس هو جو يوجا شاهى شوهان يرفض التوريث" !!

المشهد الثالث

تفوت سنين.. أميتاب باتشان راجع من شغله _وعهد الله لسه شباب برضه_ يدخل البيت.. يلاقى ست كبيرة عجوزة نكتشف ان هيه دى الطفلة الصغيرة اللي لقاها قدام الجامع.. فجأة تيجي العصابة تخطفها قدامه المرة دى..يجرى وراهم

بالفيل (الفور باى فور) لغاية ما يوصل لبيت الراجل قليل
الأدب الشرير اللي أكيد عنده تمساح!!

يدخل البهو الكبير يلاقى الراجل واقف والست متعلقة من
صرصور رجلها فى السقف .. يدور بعنيه ع التمساح.. يسأل
الراجل بالهندي :

- التمساح بتاعك فين يا عم؟

يرد الراجل :

- فى البير اللي فوقه مامتك

يتعجب أميتاب بالهندي :

- مامتى؟ يرد الراجل بشماته :

- أيوة الست دى أمك .. نياهاهاهاها

ينظر له أميتاب وهو يضحك ويقول فى سره : عبيط ده وللا
ايه؟

يتأثر جدا أميتاب ويراجع بالهندي نشيد (أمى نداء محبة بل إن
كل الحب أم) ويمسك وجه الست بحنان ويقول لها : انتى
أمى؟

ترد الست :

- أيوة يا أميتاب يا ابنى .. أنا مارضيئتس أقول لك ع الحقيقة
المرة دى وانا فى اللفة عشان العار .. وعشان تصدق شوف
دى

تطلع له سلسلة فضة عليها صورة واحد مايعرفوش .. أكيد ده
ابويا؟ ترد عليه : لا يا بنى دى صورة عشيقى .. يغنى لها
نص ساعة وتغنيه نص ساعة .. يحضنها أميتاب بإيد كالعادة

ويخلص ع العصابة بالإيد الثانية وطبعا يخللى التمساح ياكل
الراجل الشرير (الثافل الوحث) يخرج من القصر يقول لأمه :
انجزى يا حاجة عشان عندنا النهادرة تعديل دستور.. ينظر
إلى اليفط المتعلقة: "الرئيس حادى بادى كرنب زبادى شالو
حطو كله علادى هوجا يوجا شاهى شوهان يرفض
التوريث!!"

المشهد الأخير

تفوت سنين.. أميتاب باتشان راجع من شغله_عليا
الطلاق بالتلاتة لسة شباب برضه_.. راجع البيت يلقي الست
أمه بقت عجوزة أوى.. فجأة يبجى واحد شباب على
موتوسيكل يطخ الولية عيارين .. يجرى وراه أميتاب بالفيل
يكتشف ان الراجل ده بيقى حفيد الراجل الشرير .. يقتله
أميتاب باتشان ويرجع لأمه يغنى لها نص ساعة وتغنيه نص
ساعة .. الست تقول له وهيه بتموت :

- أميتاب يابنى أنا عايزة اقول لك على سر.. أنا مش أمك أنا
أبقى جدتك .. والراجل اللي انت قتلته ده بيقى ابن أخت
المخرج .. والراجل الشرير بيقى خالك .. وابن الراجل
الشرير بيقى عمك .. والعصابة كلها أخواتك فى الرضاعة
يصرخ أميتاب باتشان من الصدمة ويغنى نص ساعة وهيه

تغنى نص ساعة والواد المقتول يغنى نص ساعة .. الست
المجهولة دى تقول له :

-انت مش مستعجل ليه ؟ هوه مفيش تعديل دستورى النهاردة؟
يرد أميتاب :

- النهاردة الخميس أجازة م التعديلات !!
تموت الأم .. يلفها أميتاب بقماش من بتاع اليفط مكتوب عليه:

(الشعب أساسا يقبل التوريث) !!

فيلم رجل المستحيل

(أ.ص) ضابط مخابرات مصرى جامد، داخل ع
الستين من عمره، يرمز له بالرمز (ب-٥١٦) ، حرف الباء
يعنى أنه من بولاق، أما الرقم ٥١٦ فده رقم الأتوبيس اللي
بيركبه عشان يوصل محطة البحوث ومنها يوصل لرمسيس
يغير المترو عشان ينزل محطة القبة بتاعة المخابرات. هذا لأن
(أ.ص) رجل من نوع خاص حيث أنه يجيد قيادة كل أنواع
المواصلات من الطائرات والغواصات والسوبرجيت حتى
التوك توك، ويجيد استخدام جميع أنواع الأسلحة من المسدس
وبمب العيد حتى القنابل النووية والهيدروجينية، ويجيد ٦٦ لغة
بالصلا ع النبي وفيه لغتين اتعلمهم وهو نايم، ويجيد جميع
أنواع التتكر، وجميع أنواع القتال والألعاب من التايكوندو
وحتى عريس وعروسة !!
لقد أجمع الكل ومنهم أنا أنه من المستحيل وربنا أن
يجيد رجل واحد فى عمر جدى كل هذه المهارات ولذلك
استحق هذا اللقب .. رجل المستحيل !!

المغامرة رقم ٦٥٤٦٨ اختطاف محسن

ازاي الكلام ده؟؟

جلس مدير المخابرات الجديد على مكتبه وهو يتذكر ما حدث حتى الآن فى هذا الأمر الصعب الذى تمر به مصر وما حدث من (أ.ص) (المزيد من التفاصيل راجع العدد السابق ٦٥٤٦٧ الجزء التاسع من المغامرة بعنوان "قال عايزين يخطفوا محسن") وبعد قليل طرق (أ.ص) الباب فأذن له بالدخول واستنشق بعض الأكسجين من الهواء فالإنسان لابد أن يستنشق الأكسجين (حقيقة علمية) ..

وقال لـ (أ.ص) :

- الأمر اتأزم جدا يا ب-٥١٦، نص محافظات مصر مش لاقية تشرب مية والناس خرجت بالجراكن وعاملين ثورة اسمها ثورة الخراطيم، كل واحد جاى بالخرطوم وهيقطعنا.. والقيادة العليا بتتشك فى إن ده ملعوب من المخابرات المعادية الإس... (لا لا مش الإسرائيلية) وكمان التقارير بتقول ان سونيا جراهام هنا

يغضب (أ.ص) ويقول:

- يبقى جه الوقت اللي هاقدر آخذ ابنى الرضيع منها !!

فى حة ضللة وانحرفت العصابة وظهر هو للعصابة فخرج
من السارة ١٠٠ شخص مسلحين ولكنه أخرج مسدسه أبو ٦
طلقات وضرب رشاشاتهم كلهم من غير ما يجرح واحد فيهم
وبعدين للأسف المسدس معدش فيه رصاص ولكن (أ.ص)
رجل المواقف الصعبة دور الضرب فى الرجالة .. ففقد ٦٥
واحد الوعى ولكن الثانين فهموا الخدعة فعملوا دائرة حوله
ولكنه طار فى الجو ونزل عليهم كلهم .. وفى لحظة وصلت
إمدادات العدو كمان ٢٠٠ واحد .. ولكنه ضربهم كلهم برضه
ووصلت الإمدادات الثانية حوالى ٥٠٠ واحد كمان ولكن
الكثرة تغلب الشجاعة .. يعنى حوالى ٨٠٠ واحد على واحد
كثير برضه

وفقد (أ.ص) الوعى أمام عدوه اللدود ..

الفضيع ..

الشنيع ..

المريع ..

والله ما يحصل !!

أفاق (أ.ص) فوجد نفسه فى مخزن وبجانبيه المحروس
قدرى كالعادة مربوط.. وأمامهما سونيا جراهام ست زى القمر
فقال لها:

- ايه الحلاوة دى يا سونيا؟؟ انت كل ما تكبرى تحلوى؟؟

- مش أحسن منك ياللى مش بتكبر أصلا!!

يتمتم قائلا: بالنساء!!

ويسألها: ليه انتوا قطعتموا المية عن نص البلد والناس مش
لاقيه تشرب وبتشرب مية المجارى والناس مش عارفه تغسل
وبيغسلوا هدومهم فى الترة؟؟

تقول سونيا: عشان الشعب يفكر ظلما ان الحكومة بتاعتكم
هيه اللي عاملة كده؟

- يعنى بجد والله الحكومة مالهاش ذنب؟

ترد سونيا : لا طبعا .. حكومتكم أحسن حكومة دلوقتى
..الشباب كلهم بيشتغلوا.. الجنيه بقى أعلى م الدولار ..
الأسعار نزلت ..الانترنت بقى ببلاش فى البيوت.. ما فيش
حاجة بتتباع فى البلد..الفضيلة انتشرت فى البلد ولغوا كل
القنوات اللي بتتحدى الممل.. المية واصلة للبلد كلها والمواسير
بقالها ٢٠٠ سنة عشان المحافظة ع التراث.. انتوا اللي شعب
غلباوى..
غلباوى..
غلباوى..

ما تلمى نفسك بقى !!

قطع (أ.ص) قيوده فجأة وماتسألش ازاي (آه نسينا نقول
فى المقدمة انه يجيد التخلص من كل القيود فى الدنيا) وصفع
سونيا جامد يعنى ولكن الحارس جه من وراه وضربه ولكن
منى (اللى أصلا عندها كام وخمسين سنة) جت فجأة مش

عارفين منين برضه وضربت الحارس من وراه وأنقذت
الموقف .. نظر (أ.ص) فى عين منى وقال لها تتجوزينى؟؟
ترد منى فى حياء: ماينفعش عشان أنا جسمى كله واوا ..
يغضب ويخرج من المكان بعد أن حرر قدرى وهوه يغنى
"ليك الواوا .. بوس الواوا .. خللى الواوا يصح"

وهو فى الطريق ينحرف الجميع إلى أقرب بيت ويطلب منه
بعض الماء للشرب .. ولكن صاحب البيت الحاج بيومى يخرج
بمقشة هوه وعياله ويحتجزون (أ.ص) ورفاقه وهو يصرخ:
زى ما العصابة خطفت محسن ابنى، أنا كمان هاخطفكم،
وبعدين انتوا جايين تطلبوا مية؟؟ هوه فيه مية فى البلد ياولاد
اللاذينا؟؟ !!

.. اللاذينا

.. اللاذينا

.. اللاذينا

انتهى الجزء التاسع

العدد القادم

(لسة خاطفين محسن)

- كيف يخرج (أ.ص) ورفاقه من بيت الحاج بيومى؟
- كيف يستطيع (أ.ص) بعد كل هذه الصعاب أن يحصل على
كوز مية عشان يشرب؟

- هل يستطيع (أ.ص) أن يحرر محسن ابن الحاج بيومي وللا هيسيه يتحرق؟
- هل يستطيع (أ.ص) أن يوضح الموقف للرأى العام وهو أن حكومتنا زى الفل ودايما الغلط على الأعداء؟
- سيب اللي ف إيدك .. وقائل بايدك ورجلك وكبدك مع رجل المستحيل !!

معبودة الجماهير ٢٠٠٨

(إبراهيم الكومبارس وهو يؤدي دور العاشق مع سهير في مسرحية من إخراج المخرج الخنيق):

" باحبك باحبك .. كلمة بقالى كثير عايز اقولهاك بس مكش عندى الشجاعة انى اقولها. جايز عشان أسعار دقايق التليفونات الأرضى غليت فمعرفة اتصل بيك.. وجايز عشان شبكات المحمول كلها شبكتها مايعلم بيها إلا ربنا شاطرين بس يرخصوا سعر الدقيقة والناس مش عارفة تتكلم أساسا.. وجايز عشان الحكومة عاوزة تحرم التكاك فى البلد وتشرد كام ألف شاب ماصدقوا انهم يلاقوا شغلانة فمقدرتش أجيلك راكب تو توك عشان اقولهاك.. بس المهم انى باحبك يعنى "

ترد سهير

"من زمان وانا مستنية اللحظة دى.. اللى تنطق وتقولها.. والحب عمره ما بتفرق معاه الفلوس.. يعنى الحب مش هتفرق معاه ان واحد معفن زيك يحب واحدة مشهورة زى.. دى بتحصل فى أحسن العائلات.. وبعدين موضوع الجواز ده اتلغى

من نفسيات الشباب أساسا..بقى زى الغول والعنقاء والخل
الوفى.. يعنى انت تحمد ربنا ان انا عبرتك أساسا.. بس
باحبك يا حبيبي!!"

**

حاجة غريبة حاجة غريبة
العيش ليه بقى طعمه شنيع
حاجة غريبة حاجة غريبة
فصلوا الإنتاج ع التوزيع
انتى عارفة ليه؟؟
عشان احنا مع بعضينا
جينا بجنيه عيش و حدينا
كل الناس بتبص علينا
عشان كله بيحسد فينا
حاجة غريبة حاجة غريبة

**

(حفل الزفاف فى منزل سهير ..تخدع سهير بحكاية أن إبراهيم متزوج..
فتقرر طرده)

سهير: لازم تعرف يا ابراهيم ان الفرق بينى وبينك كبير قوى..
انت بتاكل رغيف من اللى بشلن.. وانا باكل عيش توست..
انت بتشرب مية من الحنفية بكل البلاوى اللى فيها.. وانا
باشرب مية معدنية..انت بتركب توك توك.. وانا باركب

تاكسى العاصمة اللى محدش بيقرّب منه ولما تكون عربيتى
عطانة بس.. انت ..ع.....

إبراهيم: انجزى يا حاجة .. عايزة ايه يعنى؟؟

سهير: احنا مش لبعض يامنعم

إبراهيم: منعم ايه ياستى؟؟ ده فيلم تانى .. بعد ما أنت
لك..طب و حياة كل اللى عملتهولك يا سهير..و حياة كل رغيف
عيش وقفت فى الفرن بسببه ساعتين عشان تدوقيه.. و حياة كل
لتر بنزين دورت عليه فى كل بنزينات مصر ومالقيتهوش
عشانك.. و حياة امتحانات الثانوية العامة اللى دخلتها تانى
عشان خطر ك عشان احسن تعليمى و جالى بسببها بله منغولى
على كبر.. و حياة كل مرة حلفتينى انى اتفرج على برامج
المنوعات فى التليفزيون وانت عارفة انى مش ناقص هطل..
و حياة كل ده هتندمى ياسهير .. هتندمى ياسهير !!

**

يبدأ إبراهيم فى الغناء على المسرح بعد أن عرف أنهم عايزين يتفرجوا على
القرد أبو صديرى (كرامة كرامة يعنى):

جباراااااااااااار .. فى قسوته جبار

جباراااااااااااار .. فى خنفته جبار

خدعتنى ضحكته

صدقته ف نيته

ومكنتش اعرف ان الثانوية هتبقى نار بالشكل ده

ومكنتش اعرف انى برضه هاطلع حمار بالشكل ده

إبراهيم: هتلاقى ألف واحد قاعدين على القهوة اللي على
الناصية عشان مستنيين القطر بتاع الحكومة.. هما مستنيين
من زمان بصراحة بس هما عندهم صبر وقاعدين.. وفيه منهم
اللي لحق القطر فعلا بس اكتشف ان اللي قاعد ع القهوة
أحسن .. رجع تانى عشان يلحق مكان.. وبعدين هتلاقى دكاترة
بقي من اللي عايزين الكادر الخاص .. هتلاقيهم قاعدين
برضه مستنيين الموافقة على الكادر.. على شوية مهندسين
على شوية مدرسين وبتوع الضرايب العقارية .. يعنى لف
شوية بس فى البلد وانت هترزق ان شاء الله

(بعد ساعة يعود صديقه وهو فرحان)

- ياعم انا متعبتش خالص.. دانا ف ساعة واحدة جبتلى
تلاتين مليون واحد عايزين يحضروا حفلة سهير بدل ما هما
قاعدين ع القهوة !!

فيلم (انجز .. رجع لى قلبى)

المشهد الاول

(بيت متواضع بسيط بتاع الناس اللى على قد حالهم دول .. زى بيتنا يعنى ..
يدخل الأب العجوز ويفتح حجرة أولاده ويجد ابنه محسن يلعب بلاى
ستيشن)
يقول لابنه:

- محسن يا بنى لازم تذاكر عشان تدخل كلية الشرطة
وترحمنى من الخدمة فى قصر الأمير علاء بقى
- يا عم حاضر .. خلاص دخلنا فى ضربات الجزاء
أهوه .. هاخلص واعدى خمس سنين اللقطة الجاية وادخل
الشرطة علطول .. ما تقلقش
يا أبا قبل ما تطلع قوللى أخلى مين يلعب ضربة الجزاء
الجاية؟

يرد الوالد العجوز بضعف وحسرة وباللثغة بتاعة حسين
رياض: بلاش أبو تريكة يا بنى .. أحسن مصاب .. وما تتساش
معادك مع الأميرة إنجى فى ساقية الصاوى .. نصير شمة
هناك النهاردة !!

المشهد التانى

(جنينة واسعة جميلة معفنة.. الأميرة إنجى واقفة مستنية محسن لابسة بنطلون الشارل ستون وجزمة علاء الدين ومعلقه فيها المصباح السحرى كمان وبتلف سيجارة بانجو... ييجى محسن)

- انت فين يا بنى مش رنيت عليك كام مرة؟ مش معادنا فى الجنينة هنا يا بنى؟؟ انت ناسى ان انت هتضرب بالرصاصه فى ايدك النهارده من أخويا الأمير علاء وانت بتسلملى البانجو؟؟ انت مهيس وللا ايه؟؟

- آسف يا حبيبتى نسيت .. دا انا رحى لك هناك مكنة الرى بتاعة الصاوى دى.. ما لقيتكيش .. المهم هوه فين علاء؟.. مش هيضربنى بالرصاصه وللا ايه؟ ما البانجو فى ايدى أهوه!! أنا واعد أبويا انى هابقى ظابط ع السريع يعنى يخرج الأمير علاء..وهو يضربه بالرصاص ويصرخ:أنا هاعرفك يا سافل ازاي تسمح لنفسك وانت ابن الجنائينى وتجييب لأختى بنت الأمير بانجو مغشوش يا حقير يستغرب محسن ويقول

- هوه انا منزلتش دم ليه؟ يرد علاء: ده رصاص مطاطى من بتاع كفاية يا غبى يلف محسن حول نفسه ويقول:طب أنا عايز امسح ايدى هاتى منديل يا إنجى..

ترد إنجى: آسفة يا محسن خلصت كل المناديل فى الميك أب..امسح فى كمك !!

يرجع الأب وهو اتخرس من الرفض.. وهو لسة داخل من
الباب تقوم المظاهرة بتاعة كفاية.. يقف فى البلكونة.. مع أولاده
الى المفروض انهم من الأحرار ومع ذلك واقفين فى البلكونة
المظاهرة تشتد والأمن مطوق المكان
فجأة يبدأ الأب فى الكلام

اب... اب... اب... اب... اب... اب... ابعدوا بالمظاهرة بعيد
عن بيتنا يا ولاد الإيه... خبط العساكر هيهد البيت
يصرخ محسن وينده لأمه من جوه
أمى .. أبويا نطق .. الحقى
الأم قاعدة قدام وصلة الدش بتتفرج على المصارعة.. وحلقة
بين ترابل إتش وكين
- حاضر حاضر حاضر.. هيه الدنيا طارت.. هوه لحق
يتخرس؟

ينتقل المشهد فجأة ومحسن فى قصر الأمير علاء وبيأخذ
الأميرة إنجى .. ومستخبى من الأمير علاء عشان هيضربه
بالرصاص بس الأمير علاء مايطلعش
محسن بيبيص ف ساعته
- علاء مش هينجز وللا إيه؟؟ كل مرة يتأخر عن ضرب
النار؟؟

إنجى ترد عليه فى حب:
ما تخافش يا حبيبي.. أنا لقيت له سيجارتين بانجو يتلهى
فيهم!!

فيلم صلاح الدين ٢٠٠٨

(البطل صلاح الدين الأيوبي ليس مادة للسخرية بالتأكيد..
ولكننا نقصد مشاهدة الفيلم المعروف وخاصة بعد أن تأكدنا
أن عيسى العوام ليس مسيحيا أصلا وأن كل أحداث الفيلم
عارية من الصحة التاريخية)

صلاح الدين ذاهب إلى معسكر الأعداء طلبا للصلح..

الأعداء يعرفون أنفسهم:

- ريتشارد كبد الأسد

- فيليب أنطونيو

- كونراد

- محسن بتاع الحديد

- رونالدينهو

يرد صلاح الدين

- صلاح الدين عبد الله وخادم العرب

- إن يدك ملوثة بدماء المسيحيين

- إننا دائما نحقق الدماء وهذه تعاليم رسولنا الكريم محمد

يرد ريتشارد في خشوع

- صلى الله عليه وسلم

- ويمكنكم إذن أن تسألوا عنى عيسى العوام فهو مسيحي
وأعز اصدقائي.. تعال يا عوام

يدخل عيسى العوام وهو يرتدى بدلة غوص بز عانف ومعلق
اسطوانة اكسجين

- خير يا جماعة؟؟

- يقولون أننى أظلم المسيحيين

- كذبتم.. ومن يتكلم من هؤلاء.. كيف تتكلم يا محسن وقد

جعلت سعر الحديد ٨٠٠٠ أوقية من الذهب الأصفر الأخضر

أبو عيون جريئة؟؟ كيف يبني سكان أورشليم المصاطب

بتاعتهم؟؟ هل تركت توكيل الحديد وجايب توكيل زيت

الزيتون عشان كده جاى أورشليم مدينة الزيتون؟؟ كيف

تستطيع أن تتكلم وتدافع عن أهل أورشليم وكيلو الرز بخمسة

جنيه وزجاجة الزيت باتتاشر جنيه ومش من النضيف!!

ولكنكم تحرقون أغصان الزيتون وعهد الله.. دا انتوا نهبتوا

الزيتون نفسه ياراجل !!

**

فاصل إعلاني

أشرف

كلمة بسيطة لكن معناها كبير

اتكلم من الكبد

**

جنود صلاح الدين قبل المعركة

- إنهم أتون إلينا.. يقال أن قائدهم هو ريتشارد كبد الأسد ذاته..

- ريتشارد ذاته؟؟ لقد سمعت أنه يفطر بوجبتين كنتاكي حجم عائلي..

- كنتاكي؟؟ ياللعار.. إنه لا يقاطع البضائع الأمريكية!!

**

معسكر صلاح الدين بعد انتصاره..

الجنود قاعدين يضحكوا ويلعبوا

- لما رآني أحدهم أبارزه على حصاني من غير لجام أغمى عليه

- أما أنا فقد بعث حصاني واشتريت توك توكا حتى يساعدني في الحرب وبعدها نطع منه بسبوبة

- دال.. نريد بيت غزل أوله دال

- دايما دموع.. دموع.. دمووووووع

- كفانا دموعا.. المسابقة في فنون الحب والفرشة

- إذن.. دلع..أها.. دلع عيني دلع.. إنها قصيدة جديدة لكاظم الدياتيبي!!

- أين القائد حسام؟؟

- إنه لم يأت بعد

- كيف طاوعك لسانك أن تقول هذا ونحن ماشاء الله بنهلس يا عم الحاج؟؟

- يقال أن القائد حسام فى طابور العيش منذ أكثر من
يومين..أتمنى أن يصل سريعا لتكتمل فرحة السلطان؟
- أيهما تريد أن يصل؟؟ العيش أم القائد حسام؟؟
- العيش طبعاً يا صاحبي .. يقال أن شهداء طابور العيش
أكثر عدداً من شهدائنا فى الحرب، نحمد الله أننا هنا نحارب
ولسنا فى تلك الطوابير..
- القائد حسام مات
- مات؟؟؟ لا .. لا.. لا..... اللعنة على الطوابيريير.. اللعنة
على الأبرار!!!

**

فاصل إعلاني

حاسس انك وحيد
على الأقل فيه اتنين غيرك بيقرأوا الكتاب ده
حاول تلاقيهم
دور فى جيبك..وف مناخيرك
خليك أكثر غتاة وبواخة ورخامة
خليك أكثر فوبيا

**

الجنود فى معسكر صلاح الدين يفرحون بالنصر المؤقت..
- لقد قتلنا منهم الكثير اليوم وغدا سوف نقطع شوكتهم
ونبيدهم عن آخرهم

- انتظروا هل هنأتم أخاكم حسن شحاتة بالفوز بكأس الأمم؟؟
- يزدحم جميع الجنود لتهنئته
- ألف مبروك يا معلم
- العلبة كان فيها ايه ياريس؟؟
- عملت ايه فى المتغاضين منك لما رجعت؟؟
- هيجددولك يا معلم ابسط
- لن نقاتلهم غدا احتفالا بحسن شحاتة.. كل عام وأنت بخير يا حسن!!

**

ريتشارد بعد اكتشاف خيانة ملك فرنسا

- هل سمعتم من قبل عن رجل خدع ريتشارد؟؟ ولكن ريتشارد لا يرحم من يخدعه.. نياهاهاهاها .. بماذا تهمس ياسيدى الدوق؟؟ أحزين أنت على فراق فيليب؟؟ هل هذا لأنه وفر لكم وصلة الدش المركزى اللى بتجيب أوربت وايه آر تى؟؟

إننى لم أطرده بسبب مقتل الأسرى العرب..

- اللعنة عليه.. إن القنوات تأتى مهزوزة ولا أستطيع الفرجة على المصارعة ولم أعرف ماذا فعل كين مع جون سينا ولهذا طردته من معسكرنا
- شاطر بس يقعد يقول: فيليب أنطونيو مش هتقدر تغمض عنيك!!

أقسم بشرفى أنا ريتشارد كبد الأسد أننى سأكمل الحملة المقدسة فالكل ينتظرنى فى إنجلترا

الكلاب فى الشوارع
القطط فى صفايح الزبالة
الفيران على سطوح البيوت
البر اغيت فى بطاطين الشعب
كلهم ينتظرنى وأنا أعود حاملا أكاليل الغار
يرد عليه كل الجنود فى صوت واحد
"غار ياغار ياغار .. ياغار ماتقول لى ياغار .. راحوا فىين
حبايب الغار .. فىين فىين .. فىين ياغار؟؟"

**

فاصل إعلانى

الست السعودية بتستخدم زيت (حبيب العمر)
والست اللبنانية بتستخدم زيت (حبيب العمر)
والست السورية بتستخدم زيت (حبيب العمر)
وبعد غلاء الأسعار
الست المصرية
(عيشة تقصر العمر) !!

**

عيسى العوام يذهب إلى الدمشقى ويطرق الباب ..
- من بالباب؟؟
- أنا عيسى العوام
- العوام؟؟
- ايوة يا عم .. أمال أنا مبلول ليه؟؟ أكيد عوام.

- وما الدليل؟؟ قل كلمة السر .
- هذا كارت شحن بخمسة وعشرين جنيه من السلطان..
- وكلمة السر المبلول في يد الجميع
- إذن اتكلم من الكبد .. تفضل بالدخول.
- جئت إليك كي تأتي معي للسلطان كي نتخلص من الأبراج.
- كيف أتى معك وقد هاجرت بعد أن زهقت من بلدكم.. لم يقدرني أحد حق قدرى.. هل تعلم أنني قد اكتشفت الفموة هفوة.. لقد ساعدوني هنا.. وأنتم أهلى وعشيرتى زهقتونى.. وحتى لم تطلقوا على اسمى أى حاجة .. وتطالبون بشوارع لحسن شحاتة والحضرى والى عكا الخائن
- لقد أرسلنى السلطان لأخبرك أننا سنصمم مولا كبيرا اسمه اندمشقى ستارز..حتى ترضى ونتخلص من الأبراج.. هيا بنا ياعم الحاج بقى.
- هل تريدنى أن أتى معك ثم تطالبونى بالضرائب؟؟ إن إعلان (المتفوتر) خرب بيوتنا يا عوام.. يريد من الحلاق أن يدفع ضرائب!! أى أننى سأخذ معى وأنا ذاهب لأحلق بكرة خيط أبيض عشان أعمل فتلة ومعاها الفاتورة..فماذا سيفعل إذن بالدمشقى بتاع الكيميا المترشح؟؟
- لا تقلق..سنحاول ان نشغله عنك بضريبة جديدة على أى حد يقول صباح الفل!!
- إذن هيا
- خيااااااااااا .. هناك أغراااااااا..
- اهرب يادمشقى ولا تنس كارت الشحن

جنود الفرنجة

- من هؤلاء الأعراب؟؟
- أظن أنهم من جند صلاح الدين وهذا هو الساحر بتاعهم
ياترى مين اللي وراه؟؟؟؟

**

- رسول ريتشارد إلى صلاح الدين بعد مقتل الأسرى المسلمين
- إن الملك ريتشارد ما زال يتمنى الهدنة وإذا كان على شعب العراق اللي بيغتصب وعلى شعب فلسطين اللي بيموت وعلى أفغانستان اللي اتدمرت وعلى شعب لبنان اللي اتشرد وعلى الأسرى المصريين فى الحرب اللي اتقتلوا وهما من غير سلاح وعلى الغلبان اللي اتقتل فى قناة السويس عشان بيجرى على لقمة عيشه أمام البوارج الصليبية.. فإن الملك لا يعتقد أن هذه أسباب كافية لنقض الهدنة !!
 - أبلغ ريتشارد أننا نقبل الهدنة وعفا الله عما سلف !!

شوية حاجات عنى بقى يا مصر!!

اعتصام البطاطس

طبعاً أنا اعتصمت قبل كده واعتصام جامد
كمان.. ساعات لما باشوف الناس اللي بيعتصموا في نقابة
الصحفيين وللا حاجة .. باحس بمدى بساطة القضايا اللي هما
اعتصموا بشأنها بالمقارنة بقضية اعتصامى اللي شغلت
الرأى العام العائلى في بيتنا..

والحكاية باختصار.. انى من يومى وأنا مش باروح أى
مشاوير للبيت إلا إذا كانت مدفوعة الثمن.. يعنى اقعد على
الكرسى واحط رجل على رجل واسأل بالأطية: أنا ممكن
اروح المشوار ده بس تدفعوا كام؟؟ وطبعاً اللي هاخده لازم
يتناسب مع قيمة اللي انا هاجيبه.. يعنى مينفعش اشترى كيلو
لحمة بنفس سعر صابونة غسيل!!

وطبعاً بما ان الحاجة أم الاختراع زى ما مصر ام الدنيا..
كانوا بيقبلوا واروح والهف الفلوس.. لحد ما مرة طلبوا منى
أجيب من بتاع الخضار اتنين كيلو بطاطس.. وطبعاً وقفت
بكل صلابة مطالباً بحقى.. وماكان منهم إلا أن رفضوا هذا
الابتزاز السافر ووقفوا وقفة رجل واحد من اللي هيه
كده.. وقالوا : لأ!!

وبعد زعيق وشخط من كلا الجانبين بدأ أول اعتصام في
حياتى.. حيث وقفت على باب البيت مطالباً بحقى الدستورى

والذى كفله لى قانونى الخاص والمعاهدات السابقة بين دولتى
ودولة العائلة!!

وبصراحة على طول تاريخ حياتى اكتشفت ان طرق فض
الاعتصام هى طرق متشابهة..أو م الآخر هيه طريقة
واحدة..والدليل على كده ان أخويا الكبير هو الذى قدر ببساطة
يفض الاعتصام بتاعى زى ما بيعملوا جنود الأمن المركزى
بالظبط..يعنى بقلمين محترمين على وشى!!

أنا اسمى جون

مش عارف بصراحة ليه الفرنسيين بيتكلموا
فرنساوى؟؟ يعنى ايه لزمتهامطة الدلع اللى فى الآخر..
وكمان شوية الشرطات اللى فوق الحروف .. شوية ع اليمين
وشوية ع الشمال واحنا مش فاهمين أى حاجة.. يعنى فيها ايه
لما الفرنسيين يحسنوا مجموعهم ويتكلموا إنجليزى؟؟ على
الأقل يوفروا وقت فى مط الحروف.. مش عارف ليه
الفرنساوى بيفكرنى بهند رستم فى دلها.. إنما الإنجليزى
حمش كده بيفكرنى بعتريس فى شيء من الخوف.. يعنى
معلومات اسمها (إنفورميشن) .. خلاص انتهينا.. حمش حمش
يعنى.. إنما بالفرنساوى اسمها (إنفورماسيوووو) .. صلاة
النبي.. ويا سلام لو الواحد أخنف أصلا بقى.. وللا عنده لدغة
فى الرءاء.. ده يبقى فرنساوى بتاع بلده!!

أنا كل علاقتى بالفرنساوى فى الثانوية هيه النشيد اللى فى أول
صفحة فى كتاب سنة أولى.. بتاع (أنا اسمى جون وعندى
أخت اسمها مارتين).. غير كده اعتبر انك بتكلم عالم سمس !!
المدرس يوقفنى فى الفصل: اسمك ايه؟

أجوب بالفرنساوى طبعا: أنا اسمى جون وعندى أخت اسمها
مارتين

- طب عندك كام سنة؟

- حضرتك قولتلك أنا اسمى جون وعندى أخت اسمها مارتين
بقى

- يابنى طب كيف حالك؟؟

- يادى الغباء بقى..بيجييوهم منين دول؟؟ يا عم الذكى باقول
لحضرتك أنا اسمى جون وعندى أخت اسمها مارتين .. أظن
واضحة يعنى!!

نجحنا فى الثانوية ورحت قسم إنجليزى فى الجامعة بس لقيت
فيه مادة فرعية فرنساوى..وطبعا بحمد الله عدت من كل
المواد الإنجليزى ما عدا الفرنساوى مع إنها مادة فرعية أى
كلام يعنى.. أول سنة أنجح بس معايا الفرنساوى..تانى سنة
برضه.. تالت سنة برضه.. يا جماعة أنا كده بقيت معيد فى
الفرنساوى مينفعش كده.. لازم حل..

دخلت آخر سنة بقى بامتحان آخر امتحان للفرنساوى..قعدت
فى اللجنة ولقيت واحد قاعد قدامى قال لى : هو انت أشرف
توفيق؟؟

قلت :ماشاء الله .. هو التليفزيون اللى فاضح الواحد كده..
أيوة حضرتك

- اصل أنا وانت الوحيدين اللى شايلين المادة دى أصلا فى
الكلية ..والدكتور عارفك بالاسم

- ماشاء الله.. طب كويس..والدكتور ماقالكش تبلىغنى رسالة
شكر وللا حاجة؟؟

- نعم؟؟

- لا خلاص.. قول لى .. انت ذاكرت الكتاب بقى بتاع
الفرنساوى؟؟
- كتاب ايه؟؟
- كتاب الفرنساوى بتاع السنين اللى فاتت.. مش ده اللى
هنمتحن فيه؟؟
- ياعم الدكتور لغى الكتاب أصلا.. وجابلى ورق هوه اللى
هيجى منه الامتحان !!
- طب والناس اللى هيمتحنوا فى الكتاب القديم حضرتك
قاعدين فين دلوقتى بقى؟؟
- ياعم مفيش كتاب قديم.. خلاص
طبعا كانت مفاجأة عصبية.. إذا كان أنا أساسا بقالى كام سنة
شايلى المادة اللى انا بدأت أحفظ اسئلتها.. أمال لما تيجى أسئلة
تانية من دروس تانية مكتوبة أساسا باللغة السنسكرىتية دى؟؟
- طبعا من قبل ما نتكلم ازاي هنغش إن شاء الله.. المراقب جه
وقال ياجماعة لما الامتحان يبدأ اللى عايز حاجة ياخذها من
التانى عادى.. تعاون تعاون يعنى!!
- قلت له :حضرتك احنا بقالنا اربع سنين شايلىن المادة
دى.. احنا ميبيح أساسا.. يعنى لو سبتنا مع بعض احتمال
نخللى الدكتور هوه اللى يشيل المادة!!
- بدأ الامتحان.. وطبعا أول سؤال كان بيقول تكلم عن السياحة
فى مصر.. وبما إنى حافظ إجابة السؤال ده بالحرف.. فكتبت
بالخط العريض:
- أنا اسمى جون و عندى أخت اسمها مارتين !!

وبعد شوية

- أشرف؟؟ انت عملت السؤال بتاع صح وغلط؟؟
- هوه رقم كام ده؟؟
- يابنى السؤال الرابع
- بس السؤال الرابع ده مفيش قدامه أقواس
- متفلقش .. هما بس عايزين يغلطونا.. بس على مين!!
- يابنى يغلطونا إيه؟؟ الدكتور عارف انه لو جاب الامتحان بالعربي هنسقط برضه.. هيه ناقصة غلطات؟؟
- يا عم صدقنى
- خلاص انت حر.. عموما مادام السؤال الرابع طلع صح وغلط بقى.. الاتنين الأولانيين صح.. والتانيين غلط.. والأخيرة أنا شاكك فيها!!
- متأكد؟؟
- طبعا يابنى.. أنا حالل الامتحان كله فى أول خمس دقائق.. ومنتساش أنا برضه جون والأجر على الله وعندى أخت اسمها مارتين!!
- طب خد المسطرة دى هتلاقى عليها إجابات الامتحان اللى انا حللته
- طب ما تجيب الورقة اسهل يابنى مادام كده كده بنحل سوا أساساً
- لا يابنى اتق الله حرام
- فعلا عندك حق!!

أخذت المسطرة وعشت بقى.. طبعا اللي بيغشش مش فاهم
حاجة واللى بيغش مش فاهم حاجة.. تصوروا بقى اللي اتكتب
كان ايه أساسا؟؟

اللى انا فاكراه انها كانت كلمات إنجليزي تماما بس عليها
شوية شُرط بقى.. ايشى ع اليمين وايشى ع الشمال.. وايشى
فى النص.. شكلت الورقة كلها بالصلاح النبي نحويا فتحة
وضمة وكسرة.. زى الفل

طلعنا من الامتحان مية مية.. الولد راح يقابل الدكتور عشان
يراجع معاه.. وطبعا أنا واقف بعيد ولا أعرفه يا حضرة
البكباشى.. مراجعة ايه حضرتك؟؟ الدكتور ده لو قال ألمانى
أنا هاصدقه!!

الولد قال للدكتور : يادكتور هيه ايه إجابات السؤال بتاع صح
وغلط؟؟

رد الدكتور باستغراب: صح وغلط ايه يا بنى؟؟ مفيش فى
الامتحان صح وغلط!!

- أمال السؤال الرابع ده بتاع ايه؟؟

- ده بتاع صح الجملة

طبعا أنا سحبت الواد من ايده.. عشان نهرب من الموقف ..
بس السؤال اللي كان شاغل دماغى ومخلينى قلقان: ياترى
مين فينا اللي هيطلع الأول ع التانى؟؟ ولو هو طلع الأول
عليا.. يبقى ياترى مين اللي وراه؟؟

هوه التمثيل حلو؟؟

- هوه التمثيل حلو؟

طبعاً يا عم .. فلوس وشهرة ومعجبات وخلي بالك من جمع المؤنث السالم .. مش طالبة معانا جمع مذكر خالص يعنى .. بخلاف كده بقى كل يوم أخبار وناس بتجيب فى سيرتك .حد يطول تبقى سيرته على كل لسان؟ وييجى فى الجرايد بقى: وقد أكد حمودة الأهتم أن فيلمه القادم مختلف تماماً عن العك بتاع السنة اللى فانت اللى ساعتها برضه كان نفس الفيلم مختلف عن العك اللى قبله .. وعندما سألت النجمة سنية بلحة عن أحب أفلامها مسكت بطنها وقالت: كلهم أولادى .. ده حتى فيه فيلم فى التاسع دلوقتى !!

أنا مقصدش التمثيل فى السينما والكلام ده أساساً.. أنا أقصد أنك تمثل على حد فى الحياة.. طبعاً كل واحد فينا زهق تمثيل على الناس.. ده الواحد بيمثل على نفسه إنه عايش أساساً.. المهم أنا هاقول لكم موقف أنا مثلت فيه

كنا رايعين أسبوع شباب جامعات المنيا من زمان.. كانوا طالبين ثلاثة شعرا بس.. واحنا كنا خمسة كلنا شعرا ولازم نطلع .. اقترحوا اقتراح ظريف جداً.. قالوا ثلاثة منكم يروحوا شعر والأتين التانيين يتوزعوا على أى مجال

رحت المسابقة و عملنا قرعة مين هياخد موضوع ايه.. وطلع من حظى موضوع الأمية.. تصوروا بقى المفروض اتكلم عن الأمية وبالفصحى مدة عشر دقائق ومن غير ورقة كمان.. صلاة النبي أحسن .. جايلك يا أم هاشم ..جايلك يا ام العواجز أحلى حاجة فى الموضوع انهم طلعا كل مشرفين الجامعات برة القاعة .. ودى كانت أحلى حاجة فى المسابقة أساسا طبعاً مسكت الميكروفون .. وبعد ما بدأت بكل افتتاحية خطب الشيخ محمد حسان..ودخلت فى طبتم جميعاً وطاب ممشاكم .. دخلت فى الأمية .. والأمية وحشة يا جدعان .. والأمية مش حلوة يا رجاله.. والأمية مش لذيزة يا بهوات..وبعدين خير اللهم اجعله خير لقيت كده التجلى والإلهام بيرفرف .. لقيت نفسى باقول:

- ومن أهم أسباب الأمية الزواج المبكر !!

طبعاً من قواعد المسابقة ان ممنوع حد يقاطع المتسابق ورغم كده لقيت واحد من المحكمين قال لى:استنى يابنى انت.. ايه اللى جاب الأمية للزواج المبكر؟ طبعاً أنا أساساً مش عارف أنا بقول ايه..لقيت نفسى باقول له:حضرتك ما هى الواحدة الست لما بنتجوز وهيه صغيرة بتتسى اللى اتعلمته..تبقى أمية وللا لأ؟

طبعاً مش عايز اقول لكم ازاي الراجل بص لى من فوق لتحت وكأنه ببص لكريم ابن اخته بالظبط..وقال لى :كمل يا بنى كمل..وكانه بيقول لهم سيويه سيويه .هوه هيخلص لوحده

- يلا نمشى يا رجالة .. ده صوت كورال مجمع من كل
المشرفين بتوع جامعتنا
المركز الثالث عشر: المنصورة
اكتشفت بعد كده خير اللهم اجعله خير ان ده كان المركز
الأخير فى المسابقة !!
والله التحكيم كان نزيه على الأقل بالنسبة لى .. الواحد اللي
يخلى الزواج المبكر هو سبب البطالة من حقهم يطلعوه مبكر
من المسابقة !!

أشرف .. وإبراهيم

المكان : مبنى رعاية شباب الجامعة

الزمان : مادام جامعة يبقى أكيد من كام سنة يعنى يافالح

الحدث : الاستعدادات لأسبوع شباب الجامعات قبل حدوثه
بفترة

كنت هامتل الجامعة فى الشعر فى أسبوع شباب الجامعات
بحمد الله.. يعنى خلاص مهمتى بقت معروفة قبل الهنا بسنة..
وبما إن حصلت أزمة فى فرع المقال والبحوث.. ومفيش
أعمال كويسة اتقدمت.. فإذا باستدعاء رسمى : (هاتوا أشرف
يارجاله)!!

دخلت المبنى وكله بيقابلنى :

- شد حيلك

- العملية مش سهلة

- فيه غيرك عملها كتير

- انت أملنا يابطل

- وحوش فى البحر بحرية بحرية بحرية!!

قابلونى هناك وفهمونى كل حاجة:

- شوف يا أشرف.. احنا عارفين انك بتكتب بحث
كويس..عايزين منك بس بحث يكون متميز تعمله عشان ندخل
بيه أسبوع شباب الجامعات

- أيوة يا جماعة بس أنا أساسًا طالع أول شعر.. ومينفعش
أمثل الجامعة ف حاجتين..

رد الراجل بخبث: مالاحنا عايزينك تكتب البحث وتعمله باسم
أى حد صاحبك وحتى لو فاز مش هتفرق وهو مش هيظهر..
عشان هما بيقيموا الأبحاث ورق بس.. مش مناقشة..ولا من
شاف ولا من درى..

- أيوة يا جماعة بس ده مش غلط يعنى ولا من فسائف
الأمور؟؟

كلهم دخلوا عليا بنفس واحد

- يللا يا أشرف.. طلق يابنى.. وأطيعوا الله وأطيعوا الرسول
وأولى الأمر منكم!!

وبما إني حافظ فيلم الزوجة الثانية وعارف ان شكري سرحان
طلق فى الآخر عشان ميتبهدلش.. قلت مش مشكلة ياواد ..
طلق .. قصدى اكتب البحث وخلص!!

- طب يا جماعة أنا كلية آداب.. اختار صاحبي اللي هاخذ
اسمه من أى كلية؟؟

- براحتك

- طب يا جماعة البحث عن إيه؟؟

- موضوع بسيط خالص: (السوق العربية المشتركة) !!

أول حاجة اعملها كان لازم اختار الصاحب اللي هاعمل
البحث بإسمه.. وهما قالوا أى حد.. وطبعاً اخترت أعز
اصحابي: إبراهيم !!

طبعاً رحّت وقلت له

- أنا هاعمل بحث باسمك

وبغض النظر انه أساساً عاش في كلية التجارة أكثر من
عميدها.. وبغض النظر ان كل اللي يعرفه عن السوق العربية
المشتركة انها أكيد في يوم تانى غير سوق الجمعة عشان
الزحمة.. بس الراجل وافق زى الفل.. وعلنا البحث وخلص
نسيت الموضوع والحمد لله فاز بالمركز الأول..

بعد كام يوم.. طلبتني مديرة الرعاية

- الحقنى يا أشرف

- خير؟؟

- الدكتور المشرف على الأسبوع عايز يقابل الفايزين عشان
يعدّلوا بعض حاجات قبل المسابقة الأصلية..

- طب وانا مالى.. انا جاهز أقول شعر للصبح.. هاتولى
ينسون بس وانا هابدع النهاردة!

- يابنى شعر ايه؟؟ البحث بتاعك اللي بإسم إبراهيم.. لازم
إبراهيم بييجى يناقش البحث مع الدكتور؟؟

بدأت الغشاوة تروح

- أيوة حضرتك إبراهيم مين بقى؟؟ صاحبى؟؟ بتاع تجارة؟؟
اللى أساساً هو مشفّش لون الدوسية ايه؟؟.. يادى النيل..

هنتفضح يا جدعان..

ردت بسرعة:

- فيه حل

- خير؟

- تدخل للدكتور على إنك إبراهيم وتعد معاه وتناقش
والموضوع يعدى!!

- يا صلاة النبي!! أيوة وبعدين اطلع أغير هدومي وادخل له
تانى واقول له : حضرتك أنا بتاع البحث اللي كنت عندك
دلوقتي بس انا جاي دلوقتي شعر .. أصلى باحب التغيير ..
صح؟؟

- يابنى هوه مش هيناقش غير البحث بس .. انجز بقى
وتعالى

طبعا رحت تانى يوم ومش عارف اعمل ايه، قعدت معاها برة
الأوضة وهيه كل شوية تقول لى
- خلاص فهمت دورك يا أشرف.. يووووه.. قصدى يا
إبراهيم؟؟

- أقول لها: طبعا يامدام عزة.. يووووووه.. قصدى يا مدام
سنا!!

وبعدين جه مدير المكتب وقال : إبراهيم يتفضل يدخل
طبعا بما إن أكيد الست مش إبراهيم فيبقى أنا إبراهيم .. ده
اللى اكتشفته بعد تحليل الأمر
دخلت ومعايا المديرية.. الدكتور ذوق بصراحة:

- ازيك يا ابراهيم اتفضل.. انت طالب ممتاز والبحث بتاعك
زى الفل ماشاء الله وبابن عليك مثقف جدا وشكلك بتبحث
وبتروح مكتبات كثير..

رديت بسرعة: طبعا يادكتور انا يعتبر خلصت كل الكتب اللي
فى مكتبة كلية آداب!!

الراجل بص فى غلاف الملف ورفع حاجبه وقال: وانت ايه يا
ابراهيم اللي وداك مكتبة آداب؟؟ انت مش تجارة؟؟

طبعا المدير حاطة وشها فى الأرض ولولا انها مديرة وخايفة
على صورتها قدام ابراهيم اللي هوه أنا كانت لطمت
وخلص..رديت انا بثقة:

أصل حضرتك أنا خلصت مكتبة كلية تجارة كلها..ومالقيتش
فيها اللي يناسب طموحى الفكرى.. قلت اروح مكتبات باقى
الكلليات!!

- ماشاء الله ماشاء الله.. (طيب قوى الراجل ده)!!

بيعجبني جدا يا ابراهيم الشاب المثقف زيك وخصوصا انك
لسة يعنى فى مقتبل الشباب.. انت قلتلى انت ف كلية تجارة
سنة كام؟؟؟

يادى النيلة.. طب الواد صاحبي بقاله ستين سنة فى الكلية
اعرف منين هوه بقى ف سنة كام يعنى؟؟

طبعا مديرة الرعاية خلاص أغمن عليها!!

قعدت اقول : نعم؟؟ حضرتك بتقول ايه؟؟

- يابنى باسألك انت ف سنة كام؟؟

- نعم يادكتور؟؟

الراجل زهق بص على غلاف الملف..وقال : انت ف تالته؟؟
- حبيبيبيبيبيبي ..أيوة يادكتور ..بالظبط.. أنا في الفرقة الثالثة
بكلية التجارة قسم المحاسبة وإدارة الأعمال(خللى بالك من
الثقة بالفصحى)

الراجل اتبسط قوى منى عشان ثقى بنفسى وإجاباتى المنطقية
وقعد يعدل حاجات فى البحث. وبعدين قال لى: - تمام يا
إبراهيم ..انت شاب كويس..مع ألف سلامة .. وكويس يا
أستاذة انكم بتختاروا ناس زى إبراهيم.. مع ألف سلامة
طبعاً ساعتها ما صدقت انى اقوم من ع الكرسى.. ومديرة
الرعاية فاقت من صدمة الفرحة ..ما صدقت اننا هنخرج من
الأوضة دى اللى زى بيت الرعب .. ومن فرحتها قالتلى :
هاتلى كوباية المية دى يا أشرف!!!

أنا والجمبرى

كانت زيارة لطيفة جدا اختيارية إجبارية من ابن أخويا أحمد (٧ سنين) للعبد لله بعد اقتناع العيلة جميعا بأن العبد لله مقطع السمكة وديها فى البندر وشاف اللي محدش شافه وباعتبار ان أنا هاظبط الواد ابن أخويا واعمل له البحر طحينة ومش هخليه يقدر يغمض عنيه وهاتحدى الملل!!

أخذت الواد فى ايدي وأنا عاصر على نفسى قفص لمون وساكت.. ووصلنا شقتى المصونة (٣أوض وصالة وحمام ومطبخ وشرحة وبرحة ويرمح فيها الخيل) وقعدت أرتب فى دماغى جدول بكرة وازاى هاظبط الواد ده وإلا فضيحتى فى العيلة هتبقى زى فضيحة مسجون فى قسم بولاق..

مر تانى يوم زى الفل ومعدش باقى غير إنى آخذ الواد وناكل سوا بقى فى مطعم محترم يليق باسمى ومش لازم اسم العيلة.. وأول ما الواد عرف اننا رايعين مطعم محترم هناك ونعيش بقى.. اترسمت علامات الفرحة على وشه وقال لى بيراءة :عمو.. عمو.. قلت له: أيوة يا حبيبي.. قال لى : عايز اروح مطعم من اللى الناس فيه بيقولوا تحت أمرك يا فندم..

طبعا أنا كنت هاتشل.. مش من الكلمة طبعا إنما المحروس مش عارف ان كل كلمة هيقلها الرانجل بتاع تحت أمرك يا فندم فيها فلوس أكثر ضايعة من جيبى يا فندم!!!

المهم قلت ياواد يا أشرف دى مرة فى الشهر واحتمال تبقى
فى السنة وأكد هتبقى فى العمر .. وخلص كبر دماغك
واصرف ما فى الجيب ودى دقنى لو جالك حاجة فى الغيب..
والى آخر هذا الكلام المبشر

دخلنا أجدع مطعم سمك.. يونيفورم بقى وهدوم بتلمع
وترابيزات نضيفة وحركات.. أول ما قعدنا جالنا الراجل وقال
: تحت أمرك يا فندم

الواد أحمد ابن أخويا انشكح قوى وقعد يضحك.. ولو معاه
موبايل بيسجل كان سجلها والله.. أنا قلت ممكن أستغل فرحته
فى الحالة دى ونمشى وخلص مش لازم أكل.. مادام نال
اللى ف نفسه وخلص بس قلبى الطيب الكريم جدا رفض هذه
الفكرة الصائبة.

لما جيت أطلب احترت.. أنا جاى أصلا هنا عشان أطلب
حاجة مختلفة الواد مش بياكلها عشان يتبسط يعنى.. مش
هياكل فراخ عشان ال(إتشى) بتاع الطيور.. ولا لحمة عشان
هوه لسة فاكر شكلها.. ولا سمك عادى عشان شافه فى
التليفزيون..

قلت أنا هاجيب جمبرى.. أكيد الواد لسة صغير وملحقش ياكله
فى البيت يعنى..

طلبت بقلب جامد وكل ما ابص للواد وفرحته أزود فى
الطلبات وكمان فيليه ياعم.. والواد يضحك .. هات كمان
سلطات.. والواد يضحك.. وزود الرز.. والواد يضحك..

خرب بيتى بضحكته وهو فرحان قوى عشان الراجل كل
شوية يقول لى: حاجة تانية يا فندم؟؟
الأكل وصل يا جماعة.. أحمد بص فى الأكل وشاور على
الجمبرى وهو على الرز قال لى: إيه ده يا عمو؟؟ قلت له: ده
جمبرى يا حبيبي..

الواد استغرب وقال لى: جمبرى؟؟؟؟
إيه يا بنى هو رجس من عمل الشيطان!!!
وبدا الأستاذ تظهر عليه علامات القرف والزهق والكآبة
ويبص للجمبرى بقرف ويقول لى: أصل أنا محبوبش يا
عمو؟؟؟

- ياد انت هتضحك عليا؟؟ هو انت شفته قبل كده أصلا؟؟؟؟
دا انت مولود اول امبارح.. محسنى ان كل يوم عندهم
جمبرى وهو بيتكبر عليه!!
طبعا أنا اتشليت .. قدامى أكل بمبلغ وقدره مش قادر أقول
عليه عشان بيجيلى كرشة نفس.. وفى الآخر المحروس بيقول
لى مش باحب الجمبرى..

طبعا كظمت غيظى بدل ما أنط فى كرشه وقلت له بهدوء:
طب عايز تاكل إيه يا حبيبي؟؟؟

قال لى برعب وهو خايف من اختياراتى فى الأكل :: عايز
سندويتش فول وسندويتش طعمية!!!!

أنا طبخت رز

أيون .. أقر أنا المذكور أعلاه .. الساكن في العنوان
اياه (إيجار جديد) بأننى بحمد الله وتوفيقه وكرمه ثم بدعا
الوالدين ثم بالفلوس اللى ندلت معايا .. طبخت رز بنفسى ..
وعلى المتضرر اللجوء لصاحب العمارة!!!
أكيد اللى عارفنى قاعد يبص على الاسم كام مرة ويتأكد .. أيوة
يا عم أنا .. واللى مش عارفنى بيقول وايه يعنى لما يطبخ
رز؟؟

أصل العبد لله اللى هوه أنا ممنوع عنى حاجتين : السجائر
عشان حق ربنا .. والطبخ عشان حق الجار!!
قاعد لوحدى فى شقتى .. وزهقت بقى كل يوم اجيب أكل
ديليفري (اصل أنا طول عمرى كريم واللى ف جيبى مش
ليا) .. قلت أغير بقى واطبخ رز وخلص .. واللى يحصل
يحصل .. وعشان تعرفوا ليه انا حاسس انى عملت إنجاز لما
طبخت رز .. هاقول لكم أول مرة لما حببت أطبخ ..
كنت رايح اتغدى فى شقتى القديمة .. وقدامى خيرات ربنا
بقى .. والحاجات كلها انا طابخها بإيدى طبعاً .. اللانشون
والجبنة الرومى والعسل والمربى .. كل ده أنا طابخه بإيدى
يعنى .. هوه ايه الطبخ غير انى أحط الحاجات فى اطباق؟؟
المهم قلت لنفسى يلا نعمل مغامرة ونطبخ بيض .. نعم؟؟؟
بيض؟؟؟؟ أيوة يا عم بيض .. انتوا فاكرين البيض سهل ..

انتوا متقفين؟؟؟ انتوا مش متقفين..وقلت كمان ها عمله مقلى ..
أبوة .. ثقة بقى .. مش انا اللي احط البيض فى المية يطلع
مسلوق!! لازم النفس فى الطبخ!!

جبت طبق وحتيته على البوتاجاز وفضلت أخطب فى البيضة
انها تتكسر .. أبدا .. لغاية مارزعتها فى البوتاجاز ونفس
الحالة مع البيضة الثانية.. حطيت البيض فى الطبق اللي ع
البوتاجاز.

شوية بقى خير اللهم اجعله خير لقيت فيه دخان كثير.. قلت يا
واد يا أشرف ينفع كده؟؟ تنسى الزيت؟؟ لازم تحط
زيت..جبت ازازة الزيت وحتيت شوية .. بس برضه لقيت
فيه دخان كثير..قلت ياواد يا أشرف ينفع كده؟؟ فيه بيض من
غير ملح؟؟ أكيد ناقص ملح..جبت كيس الملح وحتيت ملح..
بس برضه الدخان بيكثر..قلت أكيد لازم يتحط زيت اكثر ..
مسكت ازازة الزيت تانى وحتيت زيت كثير .. والدخان
بيزيد.. يادى النيلة !!! مسكت كيس الملح أحط تانى .. ومش
عارف ايه دخل الملح بالدخان..

المهم فضلت أحط زيت وملح .. ملح وزيت .. والبيض لسة
ما اتقليش.. والدخان انتشر فى المطبخ والشقة والعمارة
والشارع..

سبت اللي يحصل يحصل و عملت وقفة مع نفسى من اللي هيه
كده وقلت ثوانى بقى .. أنا كده خلصت نص ازازة الزيت
ونص كيس الملح على بيضتين ولسة ماتقلوش..صلاة
النبي..دا انا اجيب نص كيلو لحمة أوفر!!

شوية بقى ولقيت جارتنا اللي فوق بتتده ع اللي تحت..يا ام سيد الدخان ده طالع منين؟؟؟ ترد أم السيد: يمكن من عند أم حمادة..يا ام حمادة.. الدخان ده منين؟؟ وانتشرت الدعوة من شقة لشقة وطبعا آخرتها قفلت البوتاجاز وفضلت ابص للجريمة اللي انا عاملها ومش فاهم حاجة..

بس الحمد لله اكتشفت الحل فى الآخر.. وكويس ان الغلطة مش غلطتى يعنى..

مش قبل ما يقولولنا نقلى البيض ازاي.. يقولوا ان اطباق البلاستيك ما بيتقليش فيها!!!!!!

يامر احب ياشرم الشيخ يا مراحب

بدأت الحكاية ايام الجامعة.. كانوا مختارين مجموعة من الشباب من الجنسين عشان يروحوا شرم الشيخ في رحلة سياحية مدفوعة بالكامل في واحد من أفضل فنادق شرم الشيخ. طبعا ايامها كان ده حلم صعب المنال.. ومجرد التفكير اننا نروح شرم الشيخ زى التفكير في اننا نروح المريخ من الطريق الصحراوى (الأرض-المريخ) راكبين توك توك!!

المهم بعد تحذيرات من إدارة الجامعة بأن الرحلة دى مش معسكر زى غيره.. واننا لازم نتعامل بشكل مختلف.. وهنشوف حاجات مختلفة.. وهناك في بوفيه مفتوح لأول مرة.. وطبعا أنا واحد من الناس كنت معترض على نظرية البوفيه المفتوح ده.. عشان كنت متوقع اننا أكيد هناك في الشارع فى الفسحاية اللي قدام الفندق.. بوفيه مفتوح بقى .. زى موائد الرحمن كده!!

طبعا حتى بعد الكلام ده كله من الإدارة برضه كل واحد مننا كان جاي كأنه رايح معسكر أبو قير برضه.. جايب صابونة من أم نص جنيه.. وفوطة.. وشبشب بصابع ألوان أخضر او أحمر مثلا _ مينفعش سادة عشان احنا رايحين شرم الشيخ بقى لازم نتغندر!!! _ وطبعا معلقة.. وكان السياح يعنى وهما جايين مصر السفارة بتوزع عليهم معالق عشان الفندق فقير!!

ركبنا الأتوبيس وبدأت الرحلة اللي استمرت تسع سنين عشان
نوصل قارة شرم الشيخ المتحدة.. يتخلل الطريق بعض مشاهد
حيوية لطيفة لجبال صفراء ثم حمراء ثم زرقاء وبعض الرمال
المتناثرة والشمس الحارقة وكأننا في فيلم فجر الإسلام!!!

ووصلنا شرم الشيخ.. وطبعاً كنا بنبص على أى حد ماشى في
الشارع بلهفة على أنه كائن خرافي بشنب مثلاً راجع معاناً
بالتوك توك بعد زيارتنا للمريخ من خلال طريق (المريخ-
الأرض) الزراعى .. عشان الطريق الصحراوى برد!!

وصلنا الفندق بحمد الله.. وكل واحد فضل ينصف جزمته
عشان الأرض نضيفة واللى يمسك قميص زميله ويعيط
ويتشحتف من المناظر.. طب احنا عطشانين.. فين الحنفيات
بقى؟؟؟ أيوة.. يعنى فين الكولديرات؟؟ أيوة الكولديرات اللي
هيه يتمد بقك عشان تشرب من حنفيته تحت دى وتغرق
نفسك.. فين بقى؟؟

المشرف قال يا أغيبا.. هنا فيه مية معدنية.. قلنا له: طب
حضرتك فين الكولدير اللي فيه مية معدنية بقى؟؟ وبعد
مباحثات وبعد ما شربنا.. وزعوا كل ثلاثة في أوضة.. وطبعاً
كان معايا أنا مفتاح الأوضة بما أنى الزعيم يعنى وبافهم في
الكفت..

أبص في المفتاح بتاع الأوضة.. لقيتيه مش مفتاح زى
بتاعنا.. دى بطاقة كده زى الرقم القومى.. هوو الباب ده تبع
أمن الدولة وللا ايه؟؟ أيوة يعنى الباب ده حافظ رقم بطاقتى

يعنى ومش هيدخل غيرى؟؟ وللا يمكن بيعملوا سحب على
كيس شيبسى!!

المهم رحح الأوضة ومعايا الاتنين اصحابى وشركائى في
الأوضة وطبعا منتظرين الهمام اللى هيفتح الأوضة بالسحر
اللى معاه ده.. أدخل البطاقة في مكانها والباب ميتفتحش..
أحاول تانى.. تالت.. مفيش فايده.. طب انا منظرى وحش
قوى يا جدعان.. طبعا كل ده والسياح ماشيين جنب الأوضة
بيتفرجوا واصحابى بيقولوا ياعم اسأل أى واحد فيهم.. وانا
معترض بشدة وحالف ميت يمين أبدا.. يعنى هما يبقوا ف
بلدنا وفاهمين في الرقم القومى أكثر مننا؟؟

وطبعا كانت نتيجة اعتراضى الشديد وعصبيتى انى انتظرت
اول واحد سايح يمر عشان اسأله لو هوه محتاج ازاي يفتح
الباب أنا تحت أمره!!!

أول ناس مروا كانوا ولد وبنت من السياح وطبعا مكنش فيه
وقت ولا مساحة بينهم تسمح ان حد يتدخل ويسأل .. وماشيين
بالجنب هما الاتنين وش لوش مش عارف ازاي.. ومتكلمين
في بعض وكأنهم أمين شرطة وبياع سريح في رمسيس وهما
في البوكس!! وطبعا أنا واصحابى قاعدين نتفرج.. وقلت لهم
بعد تفكير.. يبدو ان مشكلة الرقم القومى مش هيه المشكلة
الوحيدة اللى هتقابلنا هنا يا اولاد؟؟؟؟!!

تانى واحد جه راجل كبير كده وشه أحمر.. أيوة يا جماعة
الراجل ده وشه أحمر يبقى أجنبى.. احنا درسنا كده.. الراجل
اللى وشه أحمر يبقى أجنبى علطول.. أيوة ف منهج تانية

إعدادى.. دخلت عليه وبأحلى إنجليزى عندى.. سألته: ممكن
تفتح لنا الباب يا عم الحاج؟؟؟
طبعا فضل بيص لى وكأنه بيص على حفرة جديدة في
المتحف المصرى!!

خير يا جدعان؟؟ عبيط ده وللا ايه؟؟

اكتشفنا بعد تسع ساعات من الشرح المتواصل ان الزبون مش
إنجليزى اصلا.. ايطالى بالصلا ع النبي.. طب دا انا قعدت
أكون في جملة الإنجليزى ساعة قبل ما اروح له وقعدت أظبط
زمن المضارع البسيط وخطيت (إس) على الفعل مع الغائب..
زى ما قال لنا الأستاذ عادل في إعدادى.. أفهمه ازاي
بالايطالى بقى؟؟

آخر ما زهقت سحبتة من إيده الحمرا _ اللى زى وشه عشان
أجنبى.. ووقفته قدام الباب وخطيت الرقم القومى أو المفتاح
في إيده.. واتعاملت معاه زى برنامج صباح الخير يا مصر
وهما بيشرحوا الأخبار تحت للصم والبكم..

_ ياعم الحج.. احنا عايزين بليز تفتح زيز دوور.. بالصلا ع
النبي.. انت أندر ستاند في يومك ده وللا مش أندر ستاند؟؟
بص بفرحة ودخل الرقم القومى وسحبه فجأة والباب اتفتح..
بصيت له بفرحة وقعدت اقول له بابتسامة ازاي هو غبى
ومش بي فهم .. وتعبنى معاه بجد.. وياريت ميزورش مصر
تانى وبلاش السياحة اللى من الناس الأغبيا دى!! وطبعا هو
فرحان قوى وانا بابتسم.. ويرد عليا بالكلمة الوحيدة اللى هو
عارفها: ثانك يو!!!

أخلاق ولاد البلد

الواحد حاسس اننا مش زى زمان .. كان زمان كده
الواحد يسمع ان لو واحد عاكس واحدة فى الشارع ياخذ علقه
محترمة مأخدهاش سجين سياسى ف معتقل .. والناس تنلم
وكله يشارك وتحيا الوحدة العربية . والعنب العنب ..
والحاجات دى ..

حتى واحنا زمان فى الجامعة .. كانت خناقة محترمة تحتوى
على كل اللي قلبك يحبه من الأسلحة البيضاء والسودا والسيوف
بتاعة مسرور _ مش عارف كانت بتدخل ازاي دى _ عشان
واحد عاكس واحدة فجابت قرايبها .. ده بالنسبة للجامعات
العادية يعنى .. أما بالنسبة للجامعات الثانية اللي عمرنا ما
هنشوف شكلها فكانت الخناقة دايمًا بسبب ان الواد ميمى
عاكس البنت سوسو حبيبة لولو .. فقام لولو جمع كل اصحابه
اللى فى السيبر بيلعبوا شبكة واللى بيلعب ع الجيتار على
السلام واللى بينظم رحلة لشرم الشيخ .. وطلعوا كلهم على
شلة الواد ميمى وخاصموهم جامد قوى يعنى .. وحطوا
صابعهم الصغير فى صابع الثانيين الصغير .. أهو رد فعل
وخلص ..

انما اليومين دول مش عارف ليه حاسس ان المسألة انقرضت
أو ع الأقل قلت يعنى .. بنات كتير بتتعاكس ومحدث بيتكلم
ولا بيوقف اللي بيعاكس .. ومحدث يقول لى البنات لابسين

وعاملين .. أحيانا بتبقى البنت لابسة زى الفل وبرضه
بتتعاكس .. وده اللي حصل قدامى وكان هذا الموقف.
أنا كنت راكب المترو .. زحمة جدا ياناس .. كنت حاسس ان
اللى بينزل فى محطة بيجى ومعاها قرابيه فى المحطة اللي
بعدها .. اتحشرت فى حطة بين مجموعة من العظام والصدور
الرجالية طبعا .. وفضلت واقف فى مكانى ولا حد حاسس بيا
أساسا..

المهم وانا واقف لقيت راس شاب كده _ ده اللي انا شايفه
منه _ قدامى وهو بيلعب فى الموبايل بتاعه أبو كاميرا اللي
ف نفسى فيه والواد شكله مؤدب هادى .. قلت ياواد اتفرج
جايز بيلعب .. جايز بيشوف كليب للفنانة خالدة الذكر روى..
قربت منه وفجأة شفت العجب .. الشاب مشغل الكاميرا
وجايب صورة بنت فى آخر عريية المترو وظبط الزووم لحد
ما الصورة قربت جدا واستتى لما البنت كمان بتبص فى
عشان يبقى الوش كامل.. وكليك... لقط الصورة..

الغريب فى الموضوع بقى ان الواد مابصش للبنت خالص ولا
كانه بيعمل حاجة .. هو شغال فى الموبايل كأنه بيلعب فعلا
ومستحيل حد يتخيل انه بيصور.. ولا حتى أظن انه شاف
البنت برة الموبايل..

أنا شفت اللقطة دى بقى واتجننت .. وكل الكلام اللي فوق ده
انفجر فى دماغى.. الشرف.. العااالر.. الكرامة.. أخلاق ولاد
البلد.. اعتبر انها أختك.. خطيبتك بعيد الشر.. مراتك بعد
عمر طويل.. ستك الله يرحمها.. أى حد يعنى.. وعلى طريقة

درس نحو

الأمثلة

- تجلس البنات في المترو
- يقف الشباب في المترو
- إن البنات مفتريات
- إن الشباب غلبانون

الشرح

يا جماعة احنا لازم نعمل وقفة .. من اللي هيه كده !!
دلوقتي فيه مجموعة أخوات واجعين لنا دماغنا فى التليفزيون
بتوع حقوق المرأة والكلام الحمصى ده.. واحدة تطلع تقول ان
المرأة لها نفس حقوق الرجل في المجتمع والتانية تطلع تقول
- قصدى تطلع تقول - ان الراجل همجى مش بيعرف في
المرأة غير جسمها، والتالته تقول إن مصدر جمال المرأة هو
عقلها مش جسدها ولازم التعامل معاها كعقل بدون النظر إلى
الجسد هيه عاملة فيه ايه.. ده باعتبار ان الواحدة تبقى ماشية
في الشارع وواحد بقى يعاكسها:

- يا ابو عقل جامد
- ياواد انت ياابو مخيخ ملين
- حوش شعرك عشان نشوف جمال عقلك يا قمر

والواحد بقى يكلم صاحبه وهما شايفين بنت ماشية : شفت ياد العقل اللي لابس أحمر ده؟؟

والأخت إياها بيجيلها تخلف عقلى لو سمعت ان راجل قال لمراته حضرى العشا.. باعتبار ان العشا رجس من عمل الشيطان !!

والأخت العزيزة سعاد حسنى تقول البنت زى الولد ماهيش كماله عدد.. ومش عارف مين قال ان البنت كماله؟؟ البنت طبق كشرى بحاله من الكبير ابو ثلاثة جنيه.. زيه زى الولد بالظبط!!

والأخت العاشرة وليست الأخيرة ربنا يهديها تقول ازاي الراجل المتوحش القاسى التتين اللى بيطلع نار من مناخيريه بيتعامل مع الأنثى اللى هيه نسمة ماشية ع الأرض يا ولداه!!
طبعا انا باعدى الكلام ده لأنى عارف الولد المحترم بيعامل البنت المحترمة ازاي.. والزوج المحترم بيعامل الزوجة المحترمة ازاي ومش محتاجين نصايح - اسم الله على جمالهم وأدبهم - اللى فاتوا

المشكلة بقى مادام بيقولوا البنت زى الولد.. أنا ليه باقف فى المترو عشانهم بقى؟؟ أيوة يعنى أنا لما اركب المترو كام مرة فى اليوم وكل مرة اكتشف انى لازم اقف عشانهم تبقى مشكلة أدخل المترو فى أمان الله واقعد بعد جهد جهيد وانا شايف واحدة موظفة مع صاحببتها راجعين من الشغل وصحتهم زى الفل.. وقاعدة تحكى لها ازاي تعمل محشى الكوسة وقاعدة تقور فى الهوا يمين وشمال عشان يبقى الشرح عملى وصوتها

عالي.. واول ما تدخل المترو تلاقى الشلل الرعاش حل
عليها.. وعينيها مش قادرة تفتح من الإرهاق وتيجي هيه
وصاحبتهأ قدامى بالظبط وتعلى صوتها وتقول لصاحبتهأ:
معدتش باقدر أقف كثير يا سنية
ترد عليها زميلتها واللبانة ف بقها:

- ومين سمعك يا حبيبتى..الدكتور قال لى انى لو وقفت على
رجلى خمس دقائق هارجع ع اللى قدامى علطول !!
وللا البنت الصغيرة الشابة.. تبقى قاعد لا بيك ولا عليك
وتلقى المحروسة داخلة المترو .. بنت حلوة وشعرها ع
الخدود يهفهف ويرجع يطير.. وتيجي تقف قدامك.. وفجأة
تفضل تظبط شعرها وترميه ورا ظهرها زى إعلان صابون
كامى عطر فرنسى الإيحاء..ومتوقعة ان الزبون اللى هوه انا
هاقوم ابوس ايديها انها تقعد مكانى.. والله لو خلعتى شعرك
كله واديتهاولى على سبيل المقايضة زى قداماء
المصريين..برضه مش واقف !!

وبعدين الأول كانت عربيات السيدات فى المترو قدام ومع ذلك
كانوا منتشرين فى كل العربيات وقلنا ماشى..بعد ما حصلت
حادثة مترو حلوان البسيطة اول المترو.. قالوا لا.. هاتوا
السيدات فى نص المترو..ليه بقى؟؟ ده باعتبار ان لو حادثة
حصلت فى أول المترو والسيدات قدام هيصوتوا ويلموا
الدنيا.. انما الرجالة بتموت من سكات!!!صلاة النبي
طب حد مننا اعترض ان السيدات ماليين مترو الرجالة؟؟
أبدا..انما شوف بقى ياعم الحاج لو حظك الأغبر وقعك انك

ركبت سهوا في عربية السيدات.. ياداهية دقى..تسمع بقى أحلى
كلام

- أولالا

- سوفالاج

- سوهاج

- راجل؟؟

واللى تحط وشها في الأرض من الكسوف..واللى تقول
أوووه.. راجل..فانتساتيك.. انتى عمرك ماشفتى راجل
ياضنايا؟؟؟مش برضه انتى جاية من شغلك وهوه هناك
وراجعة بيتك هتلاقى واحد من نفس الفيرجن فى وشك زى
القضا المستعجل؟؟

والبنت اللى فى الجامعة آه لو شافت راجل فى المترو..
هيغمى عليها من الخضة.. مانتى لسة جاية من الجامعة
وكنتى انتى والولاد قاعدين تلعبوا (فتّحى ياوردة) و(عسكر
وحرامية).. عمرك ماشفتى راجل يا شابة؟؟؟

أيوة مادام فيه مساواة تبقى ف كل حاجة.. زى ماانا باشتغل
وهيه بتشتغل.. يبقى اللى يلحق الكرسي يقعد باعتبار انها
إبراهيم ابن خالتي يعنى عادى..ومادام فيه مساواة ولازم
نتعامل مع عقل البنت.. يبقى بلاش تلعب لى ف شعرها
وتورينى دائما انها بتحط هيد أندشولدرز ضد القشرة عشان
اقوم..لأنها زى ما بتحط هيد أندشولدرز أنا باحط برضه هيد
أنشولدرز ومن الحجم الكبير كمان أبو عشرين جنيه !!

المشكلة دي يحس بيها اللي بيركب المترو يوميا زي .نفسى
أحس انى جاى بدرى ولحقت كرسى بعرق جبينى وقاعد
أصلى ركعتين شكر على الكرسى اللي فلت من بين يدي
القوات الأنثوية الغاشمة !!

اوعى حد يفكر انى مش باقوم عشان حد يقعد..بس اقوم
عشان حد يستاهل.. يعنى ست كبيرة مريضة.. راجل عجوز
تعبان.. ست شايلة تسع عيال على ايديها..كده يعنى.. حالات
تستاهل.. انما واحدة عندها ثلاثين اربعين سنة وقاعدة
عاملالى فيها حسين رياض لما اتخرس فى رد قلبى.. أقف
ليها ليه؟؟

وكم ان شوف الموقف ده.. أقف أنا عشان واحدة ست
تقعد.. وأقف جنبها.. وأول ما تيجى تنزل محطتها تشاور
لأقرب بنت أو ست عشان تقعد مكانها!! صلاة النبى..حتى
الكرسى بيتورث يا جدعان؟؟ خيال مآة واقف جنب الكرسى
أنا؟؟؟دانا واقف عشانك..طب خليها بجميلة حتى..وموقف ورا
موقف تكتشف فى لحظة ان كل الستات والبنات قاعدين..وكل
الرجال ماسكين جرايد وقاعدين يهوا عليهم:

(ألف ليلة وليلة.. قصة كل ليلة..أحكى يا شهزاد.. أحكى
لشهر يار)

وللا البنت اللي تيجى تقعد جنبك ومش طايقة نفسها قال إيه
المكان ضيق ومش قادرة تقعد مرتاحة..طب ما دام انتى
متضايقة كده ماتقومى تقفى بلاش القعدة المقرفة دي وللا يعنى
عشان كل مرة واحد محترم شباب هوه اللي يقف عشان

المكان يوسع للهانم.. أم طاقيه.. طاقيه حمرا.. للهانم البيضا..
والهانم السمرا !!

القاعدة

- الله يخرب بيت كل اللي عقدونا ف عيشتنا بكلامهم اللي لا دين ولا منطق بيأيده..بيطالبوا بحقوق المرأة اللي على كيفهم.. مع إن ديننا جعل المرأة جوهره يتحافظ عليها وتتعامل أحسن معاملة مش سلعة وموضوع في كل برنامج شوية.
- لو كنت قاعد على كرسى في المترو.. دايمًا حاول إنك تربط رباط جزمك وانت قاعد لمدة العشرين محطة اللي انت راكبهم وماتبصش لأى حد واقف عشان قلبك المعفن الطيب!!
- خد معاك وانت راكب المترو.. علبتين هيد أنشولدرز عشان أى بنت جاية تتدلع بشعرها عشان تقعد تعرفها ان اللي معاه شامبو أكثر هوه اللي هيقد !!
- خد معاك مطوة عشان لو قلبك الطيب خلاك تقعد واحدة مكانك وبعدين وهيه نازلة شاورت لواحدة تانية تقعد مكانها وطنشتك.. تغزها بالمطوة غزتين عشان تفوق !!
- إن وأخواتها تتصب اسمها وترفع خبرها!!

أنا نازل المترو

كنت ف مشوار فى مصر الجديدة.. واللى يعرفنى يعرف ان انا اعرف فى مصر الجديدة زى ما باعرف مكان إدارة الصرف الصحى فى هولندا مثلا..مش مشكلة.. مادام معايا وصف الطريق يبقى مفيش مشكلة.. ركبت المترو اللى هو بالنسبة لى فى القاهرة زى القشة التى قصمت ظهر البعير.. قصدى زى القشة التى أنقذت الغريق .. أقصد يعنى انه حاجة حلوة وخلص.. وبعدين ركبت أتوبيس صغير ابن حلال لغاية مكان المشوار بتاعى.. وبعد ما خلصت المشوار أكيد لازم ارجع.. ومادام العريس هيتجوز تبقى العروسة هتتجوز..بس ارجع ازاي؟؟؟

طبعا أى فالح هيقول لى طب ما ترجع فى نفس الأتوبيس عشان توصل نفس المترو اللى هو القشة اللى فوق اللى بتعمل حاجات جامدة يعنى..طيب واذا كان مفيش أتوبيس من المكان اللى أنا فيه أعمل ايه؟؟؟

الحل إنى أركب أى اتوبيس فى أى اتجاه يوصلنى لأقرب محطة مترو .. أكيد كل محطات المترو برضه نفس القشة التى.. جامد يعنى .. شاورت لأتوبيس صغير ابن حلال وقلت للسواق:هتعدى ع المترو يا أسطى عشان أنا بس مش عارف الطريق؟؟؟ الراجل بكل وداعة وحنية وطيبة (ملاك يا ناس) قال لى: طبعا يا أستاذ..دخلت الأتوبيس وقعدت فى الكرسي

الأخير.. دفعت للراجل اللي جنبى نص جنيه عشان أنا نازل بدرى المترو يعنى إنما أصلا الأجرة خمسة وسبعين قرش.. فجأة لقيت السواق بيقول الأجرة ناقصة يا جدعان.. الراجل اللي جنبى متطوعا قال: لا الأجرة مش ناقصة أصل الأستاذ (قصده عليا بلا فخر) نازل المترو.. السواق مش سامع.. الراجل اللي قدام تطوع وقال: الأجرة مش ناقصة أصل الأستاذ (قصده عليا برضه بلا فخر) نازل المترو.. الكاسيت صوته عالي فالسواق ماسمعش.. الست اللي قدام تطوعت وزعقت: يا عم الأجرة مش ناقصة أصل الأستاذ اللي ورا (وربنا قصدها عليا) نازل المترو.. الست اللي جنبها قامت من النوم على الصوت العالي: خير يا إخواننا؟؟؟ رد الراجل اللي جنبها: أصل الأجرة مش ناقصة عشان الأستاذ اللي ورا (بدأ يشاور عليا) نازل المترو.. الست بصت ورا.. الراجل التانى اللي جنبى حط إيده عليا وقال لها: أيوة الأجرة مش ناقصة عشان الأستاذ ده (كسر كتفى) نازل المترو..

خمس دقائق بس والأتوبيس كله كان بيتناقش ازاي السواق افكر ان الأجرة ناقصة وهيه مش ناقصة عشان الأستاذ (اللى هو أنا) نازل المترو.. فجأة لقيت الراجل اللي جنبى بيقول لى باستغراب: هو حضرتك نازل فين؟؟؟

قلت له: حضرتك مصر كلها ماشية فى الشارع عارفة ان أنا دافع نص جنيه عشان نازل المترو

قال لى باستغراب: بس محطة المترو فانت من زمان يا أستاذ!!!!

معلومات تفصيلية عن الكاتب

الاسم: مكتوب على غلاف الكتاب من برة
سنة الميلاد: يعنى بعد ثورة عرابى بشوية سنين كده
المهنة: بناقط رزقنا.. مستورة الحمد لله
الموقف من التجنيد: مفيش أى موقف بينى وبين التجنيد الحمد
لله.. احنا سمنا على غسل والتجنيد زى الفل
محل الميلاد: أكيد مش محافظة حلوان.. ولا محافظة ٦
أكتوبر.. أنا اتولدت قبل ما يتعملوا.. احنا جيل السمنا البلدى
محل الإقامة: أكيد فى شقة يعنى
الحالة الاجتماعية: متكلمين عليا
الجنسية: تحيا مصر ياعم
العنوان: بلاش تتشحط ورايا .. عشان إيجار مؤقت وهاطلع
منه قريب
رقم الموبايل: يا عم هو فيه شبكة عدله عشان تعرف تتصل

www.akhafdammm.blogspot.com

17-8-2009
Frida
1.30
am

الفهرس

- 5 الإهداء -
..... الفصل الأول : امتحاناتك يا مصر !!
8 امتحان اللغة العربية -
14 امتحان الجغرافيا -
17 امتحان الفلسفة والمنطق وعلم النفس والاجتماع
..... لكشة واحدة !!
20 امتحان الأحياء -
22 إجابة امتحان اللغة العربية -
..... الفصل الثاني : مرارتي يا مصر !!
28 ياريتتى كنت ف ثانوى
31 ملكة جمال البقر
34 من رمسيس لنفرتيتى .. ياقلبى لا تحزن
39 للمناققين فقط
42 العالم سنة ألفين
..... الفصل الثالث : أفلامك يا مصر !!
46 فيلم هندى
51 رجل المستحيل

- 58 ٢٠٠٨ - فيلم معبودة الجماهير
- 63 ٢٠٠٨ - فيلم انجز .. رجع لى قلبى
- 67 ٢٠٠٨ - فيلم صلاح الدين
- " الفصل الرابع " : شوية حاجات عنى بقى يا
مصر !!
- 76 - اعتصام البطاطس
- 78 - أنا اسمى جون
- 83 - هوّه التمثيل حلو؟
- 89 - أشرف وإبراهيم
- 95 - أنا والجمبرى
- 98 - أنا طبخت رز
- 101 - يامراحب ياشرم الشيخ يامراحب
- 105 - أخلاق ولاد البلد
- 108 - درس نحو
- 114 - أنا نازل المترو